

摘藻堂四庫全書薈要

史部

欽定四庫全書薈要

史部

資治通鑑卷二百五十三



詳校官編修臣汪鏞

欽定四庫全書叢要卷七千二百三十九

史部

資治通鑑卷二百五十三 宋 司馬光 撰

胡三省 音註

唐紀六十九

起彊國作噩盡上章因
敦十月凡三年有奇

僖宗惠聖恭定孝皇帝上之下

乾符四年春正月王郢誘魯寔入舟中執之

王郢因魯
寔請降事

見上卷
上年

將士從寔者皆奔潰朝廷聞之以右龍武大將

軍宋皓為江南諸道招討使先徵諸道兵外更發忠武

宣武感化三道

陳許忠武軍汴宋宣武軍徐州感化軍

宣泗二州兵新舊

合萬五千餘人並受皓節度二月郢攻陷望海鎮掠明

州又攻台州陷之刺史王葆退守唐興

唐興即今天台縣在台州西一

百一里詔二浙福建各出舟師以討之

王仙芝陷鄂州

黃巢陷鄆州殺節度使薛崇

南詔酋龍嗣立以來

為邊患殆二十年

宣宗大中十三年酋龍立酋慈由翻

中國為之虛耗

為于

偽翻而其國中亦疲弊酋龍卒謚曰景莊皇帝子法立改

元貞明承智大同國號鶴拓亦號大封人

考異曰徐雲虔南詔錄

曰南詔別名鶴拓其後亦自稱大封人是以封為國號也法好畋獵酣飲好呼委國

事於大臣閏月嶺南西道節度使辛儼奏南詔遣陀西

段瑳寶等來請和南詔官有陀西猶中國判且言諸道

兵戍邕州歲久餽餉之費疲弊中國請許其和使羸瘵

息肩羸瘵側介翻詔許之儼遣大將杜弘等齎書幣送瑳

寶還南詔但留荆南宣歙數軍戍邕州彙書自餘諸道

兵什減其七王郢橫行浙西鎮海節度使裴璩嚴兵

設備璩求不與之戰密招其黨朱實降之降戶散其徒

六七千人輸器械二十餘萬舟航粟帛稱是

稱尺勅以證翻

實為金吾將軍於是郢黨離散郢收餘衆東至明州甬

橋鎮遏使劉巨容以筒箭射殺之

劉巨容以宿州甬橋鎮遏使將兵討王郢

筒箭長纔尺餘內之竹筒注之弦上繫竹筒於手腕穀弓既發豁筒向後激矢射敵皆洞貫詳見辨誤乾符二年王郢反至是餘黨皆平璩諤之從曾孫也

裴諤見二

宗大歷十四年從才用翻

三月黃巢陷沂州

夏四月壬申朔日

有食之

賊帥柳彥璋剽掠江西

帥所類翻剽匹妙翻

陝州軍

亂逐觀察使崔碣貶碣懷州司馬

陝失冉翻碣其謁翻

黃巢與

尚讓合兵保查牙山

考異曰舊紀四年三月巢陷鄆州七月入查牙山與王仙芝合五

年二月君長仙芝皆死尚讓以兄遇害大掠淮南舊傳五年八月王鐸斬王仙芝先是尚君長弟讓以兄奉使見誅帥部衆入查牙山黃巢黃揆昆仲八人率盜數千依讓按實錄乾符二年仙芝陷曹濮巢已起兵應之三年十二月招討副都監楊復光奏草賊尚讓據查牙山官軍退保鄧州四年四月黃巢引其衆保查牙山其年冬君長乃死驚聽錄巢與仙芝俱入蘄州以仙芝獨受官而怒毆仙芝傷面由是分去時君長亦在座非仙芝死後巢方依讓也又按舊紀仙芝死後王鐸始為都統討賊而舊傳云王鐸斬仙芝又先云殺張璘乃陷廣州先云陷華州方攻潼關叙事顛錯不倫今從實錄

五月甲子以給事中楊損

為陝虢觀察使損至官誅首亂者損嗣復之子也

楊嗣復事

文宗 初桂管觀察使李瓚失政支使薛堅石屢規正之

瓚不能從及瓚被逐

李瓚被逐見上卷上年被皮義翻

堅石攝留務移

牒鄰道禁遏亂兵一方以安詔擢堅石為國子博士

六月柳彥璋襲陷江州執刺史陶祥使祥上表彥璋亦

自附降狀

上時掌翻降戶江翻

勅以彥璋為右監門將軍令散衆

赴京師以左武衛將軍劉秉仁為江州刺史彥璋不從

以戰艦百餘固湓江為水寨

湓江在江州城外接于大江故謂之湓江湓蒲奔翻

剽掠如故

剽匹妙翻

忠武都將李可封戍邊還至邠州迫

脅主帥索舊欠糧鹽

帥所類翻
索山客翻

留止四日闔境震驚秋

七月還至許州節度使崔安潛悉按誅之 庚申王仙

芝黃巢攻宋州三道兵與戰不利

三道兵平盧
宣武忠武也

賊遂圍

宋威於宋州甲寅左威衛上將軍張自勉將忠武兵七

千救宋州殺賊二千餘人賊解圍遁去王鐸盧攜欲使

張自勉以所將兵受宋威節度鄭畋以為威與自勉已

有疑忿若在麾下必為所殺不肯署奏八月辛未鐸攜

訴於上求罷免庚辰畋請歸澁川養疾

澁川在長安
東澁音產

上

皆不許

史言僖宗不能定國是

王仙芝陷安州

鹽州軍亂逐

刺史王承顏詔高品牛從珪往慰諭之貶承顏象州司

戶承顏及崔碣素有政聲以嚴肅為驕卒所逐朝廷與

貪暴致亂者同貶時人惜之

史言唐末賞罰失當且言主昏政亂能吏不惟不得

展其才亦不免於罪

從珪自鹽州還軍中請以大將王宗誠為刺

史詔宗誠詣闕將士皆釋罪仍加優給 乙卯王仙芝

陷隨州執刺史崔休徵山南東道節度使李福遣其子

將兵救隨州戰死福奏求援兵遣左武衛大將軍李昌

言將鳳翔五百騎赴之仙芝遂轉掠復郢忠武大將張

貫等四千人與宣武兵援襄州自申蔡間道逃歸

間古覓翻

詔忠武節度使崔安潛宣武節度使穆仁裕遣人約還

約還者戒約將士使還赴援也

冬十月邠寧節度使李侃奏遣兵討

王宗誠斬之餘黨悉平

逐王承顏之黨也

鄭畋與王鐸盧攜

爭論用兵於上前畋不勝退復上奏

復扶又翻下同

以為自王

仙芝俶擾

按孔安國尚書注倬始也擾亂也倬尺六翻

崔安潛首請會兵討

之繼發士卒罄竭資糧

言竭本道所有以供征行士卒資糧

賊往來千里

塗炭諸州獨不敢犯其境又以本道兵授張自勉解宋

州圍使江淮漕運流通不輸寇手今蒙盡以自勉所將

七千兵令張貫將之將即亮隸宋威斷句自勉獨歸許州

威復奏加誣毀因功受辱臣竊痛之安潛出師前後克

捷非一一旦彊兵盡付他人良將空還若勅敵忽至勅渠

京翻何以枝梧臣請以忠武四千人授威餘三千人使自

勉將之守衛其境既不侵宋威之功又免使安潛愧恥

時盧攜不以為然上不能決畋復上言宋威欺罔朝廷

敗衄狼籍

衄女六翻
籍秦昔翻

又聞王仙芝七狀請降威不為聞

奏

為于
偽翻

朝野切齒以為宜正軍法迹狀如此不應復典

兵權願與內大臣參酌

內大臣謂兩中
尉兩樞密也

早行罷黜不從

河中軍亂逐節度使劉侔縱兵焚掠以京兆尹竇瑑

為河中宣慰制置使

瑑俱
永翻

黃巢寇掠斬黃

斬黃相去
一百六十

五里曾元裕擊破之斬首四千級巢遁去十一月己酉

以竇瑑為河中節度使招討副都監楊復光遣人說

諭王仙芝仙芝遣尚君長等請降於復光

監古銜翻說
輸芮翻降戶

江翻楊復光
時屯鄧州

宋威遣兵於道中劫取君長等十二月威

秦與君長等戰於潁州西南生擒以獻復光秦君長等

實降非威所擒詔侍御史歸仁紹等鞫之

姓譜曰左傳胡子國姓歸

為楚所滅子孫或以姓為氏竟不能明斬君長等於狗脊嶺

黃巢陷匡城遂陷濮州

匡城縣屬滑州本漢長垣縣宋白曰隋開皇於婦姑城置匡城

縣以縣南有故匡城為名即孔子所畏之所濮博木翻

詔潁州刺史張自勉將諸

道兵擊之

江州刺史劉秉仁乘驛之官單舟入柳彥

璋水寨賊出不意即迎拜秉仁斬彥璋散其衆

柳彥璋為盜九

月而敗

王仙芝寇荆南節度使楊知溫知至之兄也

知楊

至見上卷懿宗咸通十一年

以文學進不知兵或告賊至知溫以為

妄不設備時漢水淺狹賊自賈鵠度

九域志郢州長壽縣有賈鵠鎮鵠七

翻艷

五年春正月丁酉朔大雪知溫方受賀

凡元旦冬至諸州鎮皆受將吏

牙賀下至縣邑亦然

賊已至城下遂陷羅城將佐共治子城而守

之治直翻

及暮知溫猶不出將佐請知溫出撫士卒知溫

紗帽阜裘而行將佐請知溫擐甲以備流矢

阜不早翻擐音宦

知溫見士卒拒戰猶賦詩示幕僚遣使告急於山南東

道節度使李福福悉其衆自將救之時有沙陀五百在

襄陽福與之俱至荊門遇賊

晉分編縣置長林縣德宗貞元二十一年又分長林

置荊門縣屬江陵府九域志在府北一百六十許里

沙陀縱騎奮擊破之仙芝聞

之焚掠江陵而去江陵城下舊三十萬戶至是死者什

三四 壬寅招討副使曾元裕大破王仙芝於申州東

所殺萬人招降散遣者亦萬人敕以宋威久病罷招討

使還青州

宋威本平盧帥罷招討使還鎮

以曾元裕為招討使潁州刺

史張自勉為副使 庚戌以西川節度使高駢為荆南

節度使兼鹽鐵轉運使 振武節度使李國昌之子克

用為沙陀副兵馬使戍蔚州

宋白曰蔚州秦趙間亦為代郡之地後魏置懷荒禦

夷二鎮於此東魏於此置北靈丘郡後周大象二年置蔚州唐開元初移郡治於靈丘西南一百三十里西至

朔州三百八十里

時河南盜賊蠭起

謂王仙芝黃巢等也

雲州沙陀兵馬

使李盡忠與牙將康君立薛志勤程懷信李存璋等謀

曰今天下大亂朝廷號令不復行於四方

復扶又翻

此乃英

雄立功名富貴之秋也吾屬雖各擁兵衆然李振武功

大官高名聞天下

言李國昌討平龐勛於當時功為其大帥振武於諸將官為高聞音問

子勇冠諸軍

冠古玩翻

若輔以舉事代北不足平也衆以為

然君立興唐人

隋分靈丘縣置安邊縣中廢唐開元十二年復置治橫野軍至德三載更名興

唐縣屬蔚州

存璋雲州人志勤奉誠人也

貞觀二十二年以內屬奚可度者部

落置饒樂都督府開元二十二年更名奉誠都督府薛志勤其府人也

會大同防禦使段

文楚兼水陸發運使

宋白曰朔州馬邑縣貞觀已來已為大同軍城開元五年分鄆陽縣

之東三十里置大同軍以戍邊後於軍內置馬邑徵漢舊名也建中間馬燧自鄆陽移朔州於馬邑縣

代

北存飢

存才旬翻再也再歲

漕運不繼文楚頗減軍士

衣米又用法稍峻軍士怨怒盡忠遣君立潛詣蔚州說

克用起兵除文楚而代之

說式
芮翻

克用曰吾父在振武侯

我稟之君立曰今機事已泄緩則生變何暇千里稟命

乎

言道里遼遠使命往返則事必泄而害成

於是盡忠夜帥牙兵攻牙城

攻雲

州牙城也帥讀曰率下同

執文楚及判官柳漢璋繫獄自知軍州事

遣召克用克用帥其衆趣雲州

趣七
喻翻

行收兵二月庚午

至城下衆且萬人屯於關雞臺下壬申盡忠遣使送符

印請克用為防禦留後癸酉盡忠械文楚等五人送關

雞臺下克用令軍士舁而食之以騎踐其骸

馬古瓦翻踐慈演翻

甲戌克用入府舍視事

錄曰乾符三年河南水災盜寇

蜂起朝廷以段文楚為代北水陸發運雲州防禦使以代支謨時歲荐飢文楚削軍人衣米諸軍咸怨太祖為雲中防邊督將部下爭訴以軍食不克請具聞奏邊校程懷信康君立等十餘帳日譁於太祖之門請共除虐帥以謝邊人衆因大譟擁太祖上馬比及雲中衆且萬人城中械文楚出以應太祖後唐閔帝時史官張昭遠撰莊宗功臣列傳曰康君立為雲中牙校事防禦使段文楚時天下將亂代北仍歲阻飢諸部豪傑咸有嘯聚邀功之志文楚法令稍峻軍食轉餉不給戍兵咨怨雲州沙陀兵馬使李盡忠私謂君立等曰段公儒者難與共事方今四方雲擾皇威不振大夫不能於此時立功立事非人豪也吾等雖擁部衆然以雄勁聞於時者莫

若李振武父子官高功大勇冠諸軍吾等合勢推之則
代北之地旬月可定功名富貴事無不濟也時武皇為
沙陀三部落副兵馬使在蔚州盡忠令君立私往圖之
曰方今天下大亂天子付將臣以邊事歲偶飢荒便削
儲給我等邊人焉能守死公家父子素以威惠及五部
當共除虐帥以謝邊人武皇曰子家尊在振武萬一相
逼俟予稟命君立曰事機已泄遲則變生咸通十三年
十二月盡忠夜帥牙兵攻牙城執文楚及判官柳漢璋
陳韜等繫之於獄遂自知軍州事遣君立召太祖於蔚
州是月太祖與退渾突厥三部落衆萬人趨雲中十四
年正月六日至關雞臺盡忠遣監軍判官符印請太祖
知留後事七日盡忠械文楚漢璋等五人送關雞臺軍
人亂食其肉九日太祖權知留後府牙受上三軍表請
授太祖大同防禦使懿宗不悅時已除盧簡方代文楚
未至而文楚被害實錄乾符元年十二月李克用殺大
同軍防禦使段文楚自稱防禦留後塞下之亂自茲始

矣薛居正五代史君立傳皆與莊宗列傳同惟削去李盡忠名但云君立與薛鐵山程懷信王行審李存璋等謀悉以盡忠語為君立之語云君立等乃夜謁武皇言曰方今天下大亂云云衆因聚譟擁武皇比及雲州衆且萬人師營關雞臺城中械文楚以應武皇之軍既收城推武皇為大同防禦留後衆狀以聞舊紀咸通十三年十二月李國昌小男李克用殺雲州防禦使段文楚據雲州自稱防禦留後乾符五年正月沙陀首領李盡忠陷遮虜軍竇滌遣康傳圭率土團二千屯代州將發求賞呼譟殺馬步軍使鄧虔有唐末三朝見聞錄者不著撰人姓名專記晉陽事其書云乾符五年戊戌竇滌自前守京兆尹拜河東節度使在任便值大同軍變殺防禦使段文楚正月二十六日軍於石窯二十七日到白泊二十九日至靜邊軍三十日築却四面城門二月一日在城將士三人共賞絹一匹監軍使差仇判官聞奏李盡忠等准詔各賞馬一匹銀鞍轡一副銀三錠銀

梳一枚絹一束錦二匹紫羅三匹諸軍將銀梳絹等三
日李盡忠却入四日兩面馬步五萬餘人城四面下營
五日又賞土團牛酒六日監軍使送牌印與李九郎七
日城南門樓上繫縛下段尚書柳漢璋雍侍御陳輜等
四人尋分付軍兵於鬪雞臺西副却又令馬軍踐踏却
骸骨八日李九郎被土團馬步軍約一千人持弓刀送
上與舊紀五年事微合實錄亦頗采之云五年正月壬
戌實幹奏沙陀首領李盡忠寇石窯白泊至靜邊軍二
月奏李盡忠求賞詔賞馬一匹銀鞍勒綿絹等按莊宗
列傳舊紀克用殺文楚在咸通十三年十二月歐陽修
五代史記取之太祖紀年錄在乾符三年薛居正五代
史新沙陀傳取之見聞錄在乾符五年二月新紀取之
惟實錄在乾符元年不知其所据何書也克用既殺文
楚豈肯晏然安處必更侵擾邊陲朝廷亦須發兵征討
而自乾符四年以前皆不見其令將士表求勅命朝廷
事唐末見聞錄叙日月今從之

不許李國昌上言乞朝廷速除大同防禦使若克用違
命臣請帥本道兵討之終不愛一子以負國家朝廷方
欲使國昌諭克用會得其奏乃以司農卿支詳為大同
軍宣慰使詔國昌語克用令迎候如常儀除克用官必
令稱愜李克用始此語牛倨翻又以太僕卿盧簡方為

大同防禦使

昌節度使盧簡方為太僕卿十二月以前義

武節度使李國昌為雲州刺史大同軍防禦等使國昌
稱病辭軍務乃以太僕卿盧簡方為雲州刺史充大同
軍防禦等使上召簡方於思政殿謂之曰卿以滄州節
制屈居大同然朕以沙陀退渾撓亂邊鄙以卿曾在雲

中惠及部落且忍屈為朕此行具達朕旨安慰國昌勿
令有所猜嫌也十四年正月辛未以雲朔暴亂代北騷
動賜盧簡方詔曰近知大同軍不安殺害段文楚李國
昌小男克用主領兵權又曰若克用暫勿主兵務束手
待朝廷除人則事出權宜不足猜慮若便圖軍柄欲奄
大同則患繫久長故難依允料國昌輸忠效節必當已
有指揮簡方準詔諭之國昌不奉詔乃詔太原節度使
崔彥昭幽州節度使張公素出師討之三月以簡方為
振武節度使至嵐州卒實錄乾符元年十二月簡方除
大同二年正月賜詔亦不云使彥昭公素討之蓋舊紀
實錄各隨段文楚死之後載除簡方及詔書使事相接
續耳恐皆未足据也舊紀所云太原幽州討之蓋因叙
後來事實錄所以不取者方知招諭未必攻討也唐末
見聞錄又云五年四月勅除簡方振武節度使五月卒
實錄亦在五年而云六月卒蓋約
奏到之月耳今從三朝見聞錄

貶楊知溫為郴州

司馬

以王仙芝犯江陵城幾失守士民多為所殺略也

曾元裕奏大破王仙

芝於黃梅

黃梅縣屬蘄州宋白曰宋分江夏郡置南新蔡郡隋開皇十八年改為黃梅縣界內有黃

梅山殺五萬餘人追斬仙芝傳首餘黨散去黃巢方攻

亳州未下尚讓帥仙芝餘眾歸之

帥讀曰率考異曰實錄元裕奏大破仙

芝於黃梅縣殺戮五萬餘人追至曹州南華縣斬仙芝傳首京師舊紀二月王仙芝餘黨攻江西招討使宋威出軍屢敗之仍宣詔書諭仙芝仙芝致書於威求節鉞威偽許之仙芝令其大將尚君長蔡溫玉奉表入朝威乃斬君長溫玉以徇仙芝怒急攻洪州陷其郭宋威赴援與賊戰大敗之殺仙芝傳首京師君長弟讓與黃巢大掠淮南舊傳曰齊克讓為兗州節度使以本軍討仙芝仙芝懼引眾歷陳許襄鄧無少長皆虜之眾號三十

萬三年七月陷江陵又遣將徐唐莒陷洪州時仙芝表請符節不允以宋威為荆南節度招討使楊復光為監軍復光遣判官吳彥宏諭以朝旨釋罪別加官爵仙芝乃令尚君長蔡溫玉楚彥威相次詣闕請罪且求恩命時宋威害復光之功並擒送闕勅於狗脊嶺斬之賊怒悉精銳擊官軍威軍大敗復光收其餘衆以統之朝廷以王鐸代為招討五年八月收復荊州斬仙芝首獻于闕下新傳黃巢自蘄州與仙芝分其衆尚君長入陳蔡巢北掠齊魯衆萬人入鄆州殺節度使薛崇進陷沂州由潁蔡保查岢山引兵復與仙芝合圍宋州會自勉救兵至仙芝解而南渡漢攻荆南陷之賊不能守巢攻和州未克仙芝自圍洪州取之使徐唐莒守進破朗岳遂圍潭州觀察使崔瑾拒却之乃向浙西擾宣潤不能得所欲身留江西趣別部還入河南帝詔崔安潛歸忠武復起宋威曾元裕以招討使還之而楊復光監軍復光以詔諭賊仙芝遣尚君長等詣闕請罪又遣威書求節

度威陽許之上言與君長戰擒之復光固言其降命侍御史與中人即訊不能明卒斬之仙芝怒還攻洪州入其郛威自將往救敗仙芝於黃梅斬五萬級獲仙芝傳首京師當此時巢方圍亳州未下君長弟讓帥仙芝潰黨歸巢新舊傳叙賊所經歷皆不推巢為王號衝天大同又云宋威殺仙芝今皆從實錄

將軍改元王霸

考異曰續寶運錄乾符元年黃巢聚衆於會稽反建元曰王霸元年舊傳先

是尚君長弟讓以兄見誅率衆入查牙山黃巢黃揆昆仲八人率盜數千依讓月餘衆至數萬陷汝州虜刺史王鐸大掠關東官軍加討屢為所敗其衆十餘萬尚讓乃與羣盜推巢為主曰衝天大將軍仍署官屬藩鎮不能制新傳曰尚君長弟讓率仙芝潰黨歸巢推巢為主號衝天大將軍署拜官屬驅河南山南之民十餘萬掠淮南建元王

霸今從之

署官屬巢襲陷沂州濮州既而屢為官軍

所敗乃遺天平節度使張勑書

敗補邁翻遺于季翻請
勑先擊翻又徒計翻

奏之詔以巢為右衛將軍令就鄆州解甲巢竟不至考

異曰舊傳及王仙芝敗巢東攻亳州不下乃襲破沂州據之仙芝餘黨悉附焉實錄巢自稱黃王建元王霸連為王師所敗詣天平乞降除右衛將軍復叛去自是兵不能制新傳曰曾元裕敗賊於申州死者萬人帝以宋威殺尚君長非是且討賊無功詔還青州以元裕為招討使張自勉為副巢破考城取濮州元裕軍荆襄援兵阻更拜自勉為副巢破考城取濮州元裕軍荆襄援兵掠襄邑雍丘詔滑州節度使李嶧壁原武巢寇葉陽翟欲窺東都會左神武大將軍劉景仁以兵五千援東都河陽節度使鄭延休兵三千壁河陰巢兵在江西者為鎮海節度使高駢所破寇鄭邲襄城陽翟者為崔安潛逐走在浙西者為節度使裴璩斬二長死者甚衆巢大

沮畏乃詣天平軍乞降詔授巢右衛將軍巢度藩鎮不一未足制已即叛去轉寇浙東執觀察使崔瑒與實錄先後不同
今從實錄 加山南東道節度使李福同平章事賞救

荆南之功也

三月羣盜陷朗州岳州

朗岳相去五百五十里

曾

元裕屯荆襄

荆襄相去三百四十里

黃巢自滑州略宋汴

滑州南至汴州

二百一十里汴州東至宋州三日五十里

乃以副使張自勉充東南面行營

招討使黃巢攻衛南

隋置楚丘縣於古楚丘城以曹遂有楚丘改曰衛南唐時屬滑州

攻葉陽翟詔發河陽兵千人赴東都與宣武昭義兵二

千人共衛宮闕

衛東都宮闕也

以左神武大將軍劉景仁克東

都應援防遏使並將三鎮兵

三鎮河陽宣武昭義

仍聽於東都募

兵二千人景仁昌之孫也

劉昌見德宗紀

又詔曾元裕將兵徑

還東都發義成兵三千守轘轅伊闕河陰武牢

河南緱氏縣北

有轘轅故關伊闕縣北有伊闕故關孟州汜水縣有虎牢關唐避先諱以虎為武

王仙芝餘

黨王重隱陷洪州江西觀察使高湘奔湖口

江州東北六十里有

湖口鎮當彭蠡湖入江之口宋朝置湖口縣

賊轉掠湖南別將曹師雄掠宣

潤詔曾元裕楊復光引兵救宣潤

湖南軍亂都將高

傑逐觀察使崔瑾鄆之子也

崔鄆見二百四十四卷文宗太和五年鄆音偃

黃巢引兵渡江攻陷虔吉饒信等州 朝廷以李克

用據雲中夏四月以前大同軍防禦使盧簡方為振武

節度使以振武節度使李國昌為大同節度使以為克

用必無以拒也

是時朝議謂使李國昌以父臨子子必無以拒豈知李國昌父子欲兼據兩鎮

考異曰唐末見聞錄遮虜軍及代州告急竇尚書差回鶻五百騎邊界巡檢至四月三日進發至五里堠北

副將康叔譚恃酒叛逆射損都將趙歸義斫損將判官閻建弘擒縛入府尚書令下於衙南門全家處斬使司

差副兵馬使趙元掠領馬軍進發閻建弘遞送海西當月內有勅送節到除前大同軍防禦使盧簡方充振武

節度使除振武節度使李尚書充大同軍節度使實錄云戊辰以簡方為振武國昌為大同蓋誤以康叔譚作

亂之日為簡方等建節之日也新沙陀傳曰李克用既殺段文楚諸校共丐克用為大同防禦留後不許發諸道兵進捕諸道不甚力而黃巢方引兵度江朝廷度未能制乃赦之以國昌為大同軍防禦使國昌不受命詔河東節度使崔彥昭幽州張公素共擊之無功据此則是大同防禦使非節度使也薛居正五代史紀曰武皇殺段文楚諸將列狀以聞請授武皇旄鉞朝廷不允徵諸道兵以討之乾符五年黃巢度江其勢滋蔓天子乃悟其事以武皇為大同軍節度使檢校工部尚書是克用為大同軍節度使非國昌實錄國昌傳及獻祖紀年錄舊唐本紀俱不言國昌為大同節度使獨實錄於此言之下五月又云國昌殺監軍不肯代必有所据蓋國昌父子俱不肯受代朝廷以為用國昌代克用必無違命故徙國昌為大同軍節度使而以盧簡方鎮振武二人竟不受命故簡方不得赴鎮而死於嵐州國昌亦未嘗赴大同也

詔以東都軍儲不

足貸商旅富人錢穀以供數月之費仍賜空名殿中侍

御史告身五通監察御史告身十通有能出家財助國

稍多者賜之時連歲旱蝗寇盜充斥耕桑半廢租賦不

足內藏虛竭無所依助

藏徂浪翻飲音次亦助也

兵部侍郎判度支

楊巖三表自陳才短不能濟辦辭極哀切詔不許

人見美官

誰不欲之乃有辭而不獲者可以觀世道矣

曹師雄寇湖州

曹師雄自宣潤進寇湖州

鎮海節度使裴璩遣兵擊破之王重隱死其將徐唐莒

據洪州

曹師雄王重隱皆王仙芝之黨

饒州將彭幼璋合義營兵克

復饒州

饒州北為黃巢所陷義營兵饒州之起義者也

南詔遣其酋望趙宗

政來請和親

南詔官有酋望在大將之下久贊之上亦清平官也酋慈由翻

無表但令

督輿牒中書請為弟而不稱臣詔百僚議之禮部侍郎

崔澹等以為南詔驕僭無禮高駢不識大體反因一僧

咕囁畢辭誘致其使

咕他協翻囁而涉翻又之涉翻僧謂景仙也景仙使南詔見上卷上

年若從其請恐垂笑後代

考異曰實錄置澹議於二月至四月又云南詔遣酋望

趙宗政來朝且議和好今因盧鄭爭蠻事置此

高駢聞之上表與澹爭辯詔諭

解之澹璵之子也

璵珙之弟也珙相武宗

五月丙申朔鄭畋盧攜

議蠻事攜欲與之和親畋固爭以為不可攜怒拂衣起

袂冒硯墮地破之

胃古泣翻繫取也掛也釋名曰硯研也研墨使和濡也

上聞之

曰大臣相詬

詬古候翻又許候翻

何以儀刑四海丁酉畋攜皆罷

為太子賓客分司

考異曰舊紀六年五月賊圍廣州與李巖崔瑒書求天平節鉞畋攜爭

論於中書辭語不遜俱罷分司畋傳曰五年黃巢東渡江淮衆百萬所經屢陷郡邑六年陷安南府據之致書與浙東觀察使崔瑒求鄆州節鉞瑒言賊勢難圖宜因授之以絕北顧之患天子下百僚議初黃巢之起也宰相盧攜以浙西觀察使高駢素有軍功奏為淮南節度使令扼賊衝尋以駢為諸道行營都統及崔瑒之奏朝臣議之有請假節以紓患者畋採衆議欲以南海節制縻之攜以始用高駢欲其立功以圖勝曰高駢將畧無

雙淮土甲兵甚銳今諸道之師方集叢爾纖寇不足平
殄何事捨之示怯而令諸軍解體邪畋曰巢賊之亂本
因飢歲人以利合乃至實繁江淮以南荐食殆半國家
久不用兵皆忘戰所在節將閉門自守尚不能技不如
釋咎包容權降恩澤彼本以飢年利合一遇豐歲孰不
懷思鄉土其衆一離則巢賊几上肉耳若此際不以計
攻全恃兵力恐天下之憂未艾也羣議然之而左僕射
于琮曰南海有市舶之利歲貢珠璣如令為妖賊所有
國藏漸當廢竭上亦望駢成功乃依攜議及中書商量
制勅畋曰妖賊百萬橫行天下高公遷延玩寇無意翦
除又從而保之彼得計矣國祚安危在我輩三四人畫
度公倚淮南用兵吾不知稅駕之所矣攜怒拂衣而起
染袂於硯因投之僖宗聞之怒曰大臣相詬何以表儀
四海二人俱罷政事攜傳曰五年黃巢陷荆南江西外
郭及饒吉虔信等州自浙東陷福建遂至嶺南陷廣州
殺節度使李巖遂抗表求節鉞初王仙芝起河南攜舉

宋威齊克讓曾來等有將畧用為招討使及宋威殺尚
君長致賊充斥朝廷遂以宰臣王鐸為都統攜深不悅
浙帥崔瑋等上表請假黃巢廣州節旄上令宰臣議攜
以王鐸為統帥欲激怒黃巢堅言不可假賊節制止授
率府率而已與同列鄭畋爭論投硯於地由是兩罷之
實錄五年五月丙申朔是日宰臣鄭畋盧攜議南蠻事
攜請降公主通和畋固爭以為不可抗論是非攜怒拂
衣而起袂染於硯因投碎之丁酉以畋攜並為太子賓
客分司注云舊史洎雜說皆云畋攜議黃巢節制忿爭
賜罷而鄭延昌撰畋行狀乃云議蠻事無可證之然當
時所述恐不謬又畋傳曰時黃巢攻陷江浙上表乞節
鉞畋與同列盧攜謀議攻討及拔用將帥事多異同又
南詔蠻請降公主和好畋固爭以為不可遂抗論之乃
與攜俱罷相又攜傳曰攜人質甚陋語亦不正與鄭畋
俱李翱之外孫及同輔政議論不協初王仙芝起河南
攜舉宋威齊克讓曾來等有將畧用為招討使討賊皆

無功致賊充斥又主高駢之請欲以公主和南詔蠻鄭
畋執之以為不可帝前忿爭由是兩罷之舊紀六年五
月賊圍廣州乃與廣南節度使李巖浙東觀察使崔瑒
書求保薦乞天平節鉞瑒巖上表論之宰相鄭畋盧攜爭
論於中書詞語不遜俱罷為太子賓客分司東都按新
舊傳舊紀皆以畋攜罷相在六年實錄新紀表在此年
五月實錄新書皆自相矛盾然宋氏多以翰林學士承
書知二人罷在五月必有所據今從之以翰林學士承

旨戶部侍郎豆盧瑑為兵部侍郎吏部侍郎崔沆為戶

部侍郎並同平章事時宰相有好施者常使人以布囊

貯錢自隨

施式豉翻
貯丁呂翻

行施匄者每出襁褓盈路

襁褓力三
翻衣無

緣也褸力主有朝士以書規之曰今百姓疲弊寇盜充
翻衣醜敝也

斥相公宜舉賢任能紀綱庶務捐不急之費杜私謁之

門使萬物各得其所則家給人足自無貧者何必如此

行小惠乎宰相大怒 邕州大將杜弘送段瑑寶至南

詔踰年而還

杜弘去年閏二月送段瑑寶還從宣翻

甲辰辛讜復遣攝巡

官賈宏大將左瑜曹朗使於南詔

復扶又翻

李國昌欲父

子并據兩鎮得大同制書毀之殺監軍不受代與李克

用合兵陷遮虜軍

遮虜軍在洪谷東北亦曰遮虜平

進擊寧武及苛嵐

軍媯州懷戎縣西有寧武軍非此此當在遮虜平南嵐州嵐谷縣有苛嵐軍按宋白續通典雲州東取寧武

媯州路至幽州七百里朔州西至岢嵐軍二百二十里
此李國昌合雲朔之兵東西攻掠既陷遮虜東擊寧武
西擊岢嵐也此即媯州之西寧武軍岢嵐
軍在嵐州東北百里岢枯我翻嵐盧含翻

武至嵐州而薨丁巳河東節度使竇滸發民塹晉陽已

未以都押牙康傳圭為代州刺史又發土團千人赴代

州土團至城北媯隊不發

媯側角翻言媯整其隊而不行也

求優賞時

府庫空竭滸遣馬步都虞候鄧虔往慰諭之土團呂虔

呂古瓦翻

牀舁其尸入府

舁羊茹翻

滸與監軍自出慰諭人給錢

三百布一端衆乃定押牙田公鐸給亂軍錢布衆遂劫

之以為都將赴代州澣借商人錢五萬緡以助軍

異曰考

唐末見聞錄五月振武損却別勅不受除替李尚書收却遮虜軍進打寧武及岢嵐軍代州告息二十二日指揮在府三城排門差夫一人齊掘四面壕塹盧尚書發赴振武至嵐州身薨二十四日拜都押牙康傳圭充代州刺史又發太原晉陽兩縣點到土團子弟一千人往代州屯駐至城北卓隊不發索出軍優賞差馬步都虞候鄧虔安慰尋被弔却牀尸柩入府尚書監軍自出安慰定每人各給錢三百文布一端差押牙田公鐸給散不放却回便被請將充都將發赴軍前使司有榜借商人助軍錢五萬貫文實錄五月李國昌殺監軍使不肯受代起兵進打寧武及岢嵐軍代州出兵禦之始國昌遣克用以兵襲大同三軍表克用為留後朝廷不允乃以國昌命之欲以其子無能拒也時國昌貪其土地欲父子分統故拒命焉實錄六月乙丑朔嵐州奏新除

振武節度使盧簡方卒以太原府都押衙康傳圭為代
州刺史發太原晉陽土團千人戍代州至城北卓隊不
發索優賞馬步都虞候鄧虔安慰為其衆殺之節度使
竇滌自出撫慰乃定初太原府帑空竭每有賞賚必科
民家至是尤窘迫乃勝借商人助軍錢五萬此皆約唐
末見聞錄為之而後其日月以象奏到之時唐末見聞
錄又云六月十一日左散騎常侍支謨奉勅到府克大
同軍制置使兼攝河東節度副使軍前同指揮使此謂
到府之日而實錄云甲戌以謨為朝廷以滌為不才六
制置使甲戌乃六月十日亦誤也

月以前昭義節度使曹翔為河東節度使王仙芝餘

黨剽掠浙西

剽匹妙翻下同

朝廷以荆南節度使高駢先在天

平有威名

高駢之威名以破蠻於交趾仙芝黨多鄆人
而徙鎮天平軍人遂畏之耳

乃徙駢為鎮海節度使 沙陀焚唐林崞縣入忻州境

武后證聖元年分五臺崞置武延縣唐隆元年更名唐林崞漢古縣也時並屬代州宋白曰唐林本漢廣武縣地九域志崞在州西南五十里崞音郭 秋七月曹翔至晉陽已亥捕土

團殺鄧虔者十三人殺之義武兵至晉陽不解甲謹譟

求優賞

謹與
諡同

翔斬其十將一人乃定發義成忠武昭義

河陽兵會于晉陽以禦沙陀八月戊寅曹翔引兵救忻

州沙陀攻崞嵐軍陷其羅城敗官軍於洪谷

洪谷在崞
嵐軍南敗

補邁
翻

晉陽閉門城守

黃巢寇宣州宣歙觀察使王凝

拒之敗於南陵

九域志南陵縣在宣州西一百五里

巢攻宣州不克乃引

兵攻浙東開山路七百里攻剽福建諸州

按九域志自婺州至衢州

界首一百九十里衢州治所至建州七百五里此路豈黃巢始開之邪剽匹妙翻

九月平盧

軍奏節度使宋威薨

老病而死固其宜也史書威死以為握兵玩寇不能報國之戒

辛丑以諸道行營招討使曾元裕領平盧節度使 壬

寅曹翔暴薨丙午昭義兵大掠晉陽坊市民自共擊之

殺千餘人乃潰 中書侍郎同平章事李蔚罷為東都

留守

蔚紆勿翻守手又翻

以吏部尚書鄭從謹為中書侍郎同平

章事從謹餘慶之孫也

鄭餘慶始見二百三十五卷德宗貞元十四年

以戶

部尚書判戶部事李都同平章事兼河中節度使冬

十月詔昭義節度使李鈞幽州節度使李可舉與吐谷

渾酋長赫連鐸白義誠沙陀酋長安慶薩葛酋長米海

萬合兵討李國昌父子於蔚州

參考新舊書安慶薩葛皆部落之名更以後廣

明元年安慶都督史敬存證之可十一月尙嵐軍翻城

見酋慈由翻長知丈翻薩桑葛翻

應沙陀丁未以河東宣慰使崔季康為河東節度代北
行營招討使沙陀攻石州庚戌崔季康救之十二月

甲戌黃巢陷福州觀察使韋岫弃城走南詔使者趙

宗政還其國

是年四月趙宗政來請和

中書不答督爽牒但作西川

節度使崔安潛書意使安潛答之崔季康及昭義節

度使李鈞與李克用戰於洪谷兩鎮兵敗鈞戰死昭義

兵還至代州士卒剽掠

剽匹妙翻

代州民殺之殆盡餘衆自

鵠鳴谷走歸上黨

鵠鳴谷在忻州秀容縣東北曰舊紀河東節度使崔季康與北面

考異

行營招討使李鈞與沙陀李克用戰于苛嵐軍之洪谷
王師大敗鈞中流矢而卒戊戌至代州昭義軍亂為代
州百姓所殺殆盡此年實錄畧同廣明元年八月實錄
河東奏昭義節度使李鈞為猛虎軍所殺又曰詔統本

道兵由雁門出討雲州與賊戰敗歸為其下殺之新紀
庚辰崔季康李鈞及李克用戰於洪谷敗績薛居正五
代史紀曰乾符六年春朝廷以昭義節度使李鈞充北
面招討使將上黨太原之師過石嶺關屯於代州與幽
州李可舉會赫連鐸同攻蔚州獻祖以一軍禦之武皇
以一軍南抵遮虜城以拒李鈞是冬大雪弓弩弦絕南
軍苦寒臨陣大敗奔歸代州李鈞中流矢而卒唐末見
聞錄曰十九日崔尚書發往岢嵐軍請別勅賈敬嗣大
夫權兵馬留後觀察判官李劭權觀察留後昭義節度
使李鈞領本道兵馬到代州軍變被代州殺戮並盡捉
到李鈞殘軍潰散取鴟鳴谷各歸本道按昭義軍變必
非李鈞所為代州百姓捉到李鈞不知如何處之今從
舊紀 王郢之亂事始上卷二年 臨安人董昌以土團討

賊有功補石鏡鎮將

垂拱四年分餘抗於潛地以故臨
水城置臨安縣屬杭州有石鏡山

石鏡鎮九域志臨安縣在州西一百二十里臨安
志石鏡山在臨安縣南一里錢鏐改為衣錦山是歲

曹師雄寇二浙杭州募諸縣鄉兵各千人以討之昌與

錢塘劉孟安阮吉富陽聞人宇鹽官徐及新城杜稜餘

杭凌文舉臨平曹信各為之都將號杭州八都錢塘餘杭皆漢

縣富陽漢富春縣晉避諱改為富陽新城吳縣鹽官漢
海鹽縣地有鹽官吳遂名縣臨平鎮在錢唐北隋於餘
杭縣置杭州後移州治錢唐後又移於柳浦西今州城
是九域志富陽在州西南七十三里鹽官在州東一百
二十九里新城在州西南一百三十里餘昌為之長長
杭在州西北七十二里將即亮翻下同

兩其後宇卒錢塘人成及代之卒子臨安人錢鏐以驍
翻

勇事昌以功為石鏡都知兵馬使

錢鏐事始此
鏐力求翻

六年春正月魏王侑薨

侑懿宗子

鎮海節度使高駢遣其

將張璘梁贊

考異曰舊紀張璘作張麟新紀傳實錄作璘今從舊高駢黃巢傳及唐年補錄妖

亂志唐補紀續實錄舊紀梁贊作梁績今從衆書

分道擊黃巢屢破之降其將

秦彥畢師鐸李罕之許勅等數十人

降戶江翻勅渠京翻為後秦彥畢師

鐸反攻高駢張本

考異曰郭延誨妖亂志曰初黃巢將蹂踐淮甸委師鐸為先鋒攻脇天長累日不克師鐸

之志沮焉及巢北向師鐸遂降北海按舊師鐸傳駢敗巢於浙西皆師鐸之效故置於此

巢遂趣廣

南趣七翻

彥徐州人師鐸冤句人罕之項城人也

賈宏

等未至南詔相繼卒於道中

去年五月辛謹使賈宏使南詔卒子恤翻

從者

死亦大半

從才用翻

時辛謹已病風痺

痺必至翻脚冷濕病也

召攝巡

官徐雲虔執其手曰謹已奏朝廷發使入南詔而使

相繼物故奈何

使疏吏翻下同

吾子既仕則思徇國能為此行

乎謹恨風痺不能拜耳因嗚咽流涕雲虔曰士為知己

死

古語云士為知己者死女明公見辟恨無以報德敢為悅已者容為于偽翻

明公見辟恨無以報德敢

不承命謹喜厚具資裝而遣之

史言辛謹垂死不忘國事

二月丙寅

雲虔至善闡城驃信見大使抗禮受副使已下拜已已

驃信使慈雙羽楊宗就館謂雲虔曰貴府牒欲使驃信

稱臣奉表貢方物驃信已遣人自西川入唐與唐約為

兄弟不則舅甥

不讀曰否

夫兄弟舅甥書幣而已何表貢之

有雲虔曰驃信既欲為弟為甥驃信景莊之子景莊豈

無兄弟

苜龍謚景莊皇帝

於驃信為諸父驃信為君則諸父皆

稱臣況弟與甥乎且驃信之先由大唐之命得合六詔

為一

事見二百一十四卷
玄宗開元二十六年

恩德深厚中間小忿罪在邊

鄙

謂南詔與西川爭
恨細故以致興戎

今驃信欲修舊好

好呼到翻

豈可違祖

宗之故事乎順祖考孝也事大國義也息戰爭仁也審

名分禮也

分扶問翻

四者皆令德也可不勉乎驃信待雲虔

甚厚雲虔留善闡十七日而還驃信以木夾二授雲虔

其一上中書門下

上時掌翻

其一牒嶺南西道然猶未肯奉

表稱貢 辛未河東軍至靜樂

靜樂漢汾陽縣地齊周之際改曰苛嵐隋開皇

十八年改曰汾源大業四年改曰靜樂唐屬嵐州九域志在州東北五十里

士卒作亂殺孔

目官石裕等壬申崔季康逃歸晉陽甲戌都頭張錯郭

咄帥行營兵攻東陽門

錯器駭翻咄滂佩翻又普罪翻又普沒翻帥讀曰率

入府

殺季康辛巳以陝虢觀察使高潯為昭義節度使

陝失冉翻

以邠寧節度使李侃為河東節度使

考異曰唐末見聞錄二十日宣慰

使到府李侃除河東節度使實錄因云庚寅除侃誤也

三月天平軍節度使張

勗薨牙將崔君裕自知州事淄州刺史曹全晟討誅之

晟知領翻

夏四月庚申朔日有食之

西川節度使崔安

潛到官不詰盜蜀人怪之

詰去吉翻

安潛曰盜非所由通容

則不能為

所由謂捕盜官吏

今窮覈則應坐者衆

覈下格翻

搜捕則

徒為煩擾甲子出庫錢千五百緡分置三市

成都城中鬻花果蠶

器於一所號蠶市鬻香藥於一所號藥市鬻器用者號七寶市置榜其上曰有能告捕

一盜賞錢五百緡盜不能獨為必有侶侶者告捕釋其

罪賞同平人未幾

幾居豈翻

有捕盜而至者盜不服曰汝與

我同為盜十七年賊皆平分汝安能捕我我與汝同死

耳安潛曰汝既知吾有榜何不捕彼以來則彼應死汝

受賞矣汝既為所先死復何辭

先悉薦翻復扶又翻

立命給捕者

錢使盜視之然後馬盜於市并滅其家於是諸盜與其侶互相疑無地容足夜不及旦散逃出境境內遂無一

人之盜安潛以蜀兵怯弱奏遣大將齎牒詣陳許募壯士與蜀人相雜訓練用之得三千人分為三軍亦戴黃帽號黃頭軍

襲忠武黃頭軍之名也

又奏乞洪州弩手教蜀人用

弩走丸而射之選得千人號神機弩營蜀兵由是浸彊

余嘗謂兵之強弱在將不在兵以秦之兵強天下而漢高祖以蜀兵定三秦自唐以來蜀兵號為懦怯然韋臯用以制吐蕃而有餘未嘗借工於他道也至李德裕始募工於他道以治器械崔安潛蓋做李德裕之故智耳諸葛孔明治蜀作木牛連弩之法自晉以下倣而為之宋自女真侵噬吳玠兄弟畫境而守蜀東南以西路兵為天下最夫豈借工於別路哉射而亦翻

涼王佺薨

佺懿宗子音他頂翻

上以羣

盜為憂王鐸曰臣為宰相之長

兩長知

在朝不足分陛下

之憂請自督諸將討之乃以鐸守司徒兼侍中充荆南

節度使南面行營招討都統

鐸自請督衆討賊天子以

宋威失策殺尚君長乃以鐸檢校司徒兼侍中門下侍

郎江陵尹荆南節度使充諸道兵馬都統舊傳四年賊

陷江陵楊知溫失守宋威破賊失策朝議統帥盧攜稱

高駢累立戰功宜付軍柄物議未允鐸廷奏臣願自率

諸軍盪滌羣盜朝議然之五年以鐸守司徒門下侍郎

同平章事兼江陵尹荆南節度使充諸道行營兵馬都

統今從實錄及新紀表

五月辛卯勅賜河東軍士銀牙將賀公

雅所部士卒作亂焚掠三城

新書地理志唐自高祖起兵於晉陽自天授已來以

為北都而晉陽宮仍隋不廢宮在都之西北宮城周二千五百二十步崇四丈八尺都城左汾右晉潛丘在中長四千三百二十一步廣三千一百二十二步周萬五千一百五十三步其崇四丈汾東曰東城貞觀十一年長史李勣築兩城之間有中城武后時築以合東城宮南有大明城故宮城也執孔目官王敬

送馬步司節度使李侃與監軍自出慰諭為之斬敬於牙門乃定泰寧節度使李係晟之曾孫也有口才而

實無勇略王鐸以其家世良將奏為行營副都統兼湖

南觀察使

官人以世而不考其才古今之通患也為鐸係失守殄民張本

使將精兵五

萬并土團屯潭州以塞嶺北之路拒黃巢

塞患則翻

河東

都虞候每夜密捕賀公雅部卒族滅之丁巳餘黨近百

人稱報冤將

近其斬翻

大掠三城焚馬步都虞候張錯府城

都虞候郭咄家節度使李侃下令以軍府不安曲順軍情收錯咄斬於牙門并逐其家以賀公雅為馬步都虞候錯咄臨刑泣言於衆曰所殺皆捕盜司密申今日冤死獨無烈士相救乎於是軍士復大譟纂取錯咄歸都虞候司

復扶又翻下巢復翻

尋下令復其舊職并召還其家收捕

盜司元義宗等三十餘家誅滅之己未以馬步都教練

使朱玫等為三城斬斫使

玫莫將兵分捕報冤將朱斬

杯翻

之軍城始定

黃巢與浙東觀察使崔瑒嶺南東道節

度使李迢書求天平節度使

瑒渠幽翻

二人為之奏聞

偽翻

朝廷不許巢復上表求廣州節度使

錄曰黃巢先求廣

府兼使相朝廷不與黃巢夏初兵屯廣南屢候勅旨不下遂恣行攻劫黃巢夏六月上表稱義軍百萬都統兼

韶廣等州觀察處置等使末云六月十五日表秋遣內

侍仇公度并廣南邕府安南安東等道節度使指揮觀

察使開國公食邑五百户官告六通又賜節度將吏空

名尚書僕射官告五十通九月二十日仇公度到廣州

至十月一日巢與公度雜匹段藥物等五馱表函并所

賜官告並却付公度表末云廣明元年十月一日上表

公度等其年十月二十九日至今如寶運錄所言則是
廣明元年十月一日巢猶在廣州也按其月巢已入長
安今從上命大臣議之左僕射于琮以為廣州市舶寶
舊紀

貨所聚

舶薄陌翻大舟也唐置市舶司於廣州以招來海中蕃舶

豈可令賊得之亦

不許乃議別除官六月宰相請除巢府率從之

曰賊圍

廣州仍與廣南節度使李迢浙東觀察使崔瑒書求保
薦乞天平節鉞迢瑒上表論之實錄迢瑒上表論請詞
甚懇激乃詔公卿集議巢又自表乞廣州節度安南都
護巢自春夏其衆大疫死者什三四欲據有嶺表永為
巢穴乃繼有是請右僕射于琮議云云時朝廷倚高駢
成功不允其奏乃議除官或云以正員將軍縻之宰相
亦沮其議乃除率府率舊巢傳曰時高駢鎮淮南表請
招討賊許之議加都統巢乃渡淮偽降于駢駢遣將張

潯帥兵受降于天長鎮巢禽潯殺之因虜其衆尋南陷
湖湘遂據交廣託崔瑒奏乞天平節度朝議不允又乞
除官時宰臣鄭畋與樞密使楊復恭欲請授同正員將
軍盧攜駁其議請授率府率如其不受請以高駢討之
新巢傳曰有詔高駢為諸道行營都統巢進寇廣州詔
李迢書求表為天平節度使又脅崔瑒言于朝宰相鄭
畋欲許之盧攜田令孜執不可巢又乞安南都護廣州
節度使書聞右僕射于琮議云云乃拜巢率府率舊盧
攜傳亦皆以為攜議授巢率府
率按此時攜已罷相今從實錄

河東節度使李侃以

軍府數有亂

數所
角翻

稱疾請尋醫勅以代州刺史康傳圭

為河東行軍司馬徵侃詣京師秋八月甲子侃發晉陽

尋以東都留守李蔚同平章事充河東節度使

蔚音
鬱

鎮海節度使高駢奏請以權舒州刺史郎幼復充留後
守浙西遣都知兵馬使張璘將兵五千於郴州守險兵
馬留後王重任將兵八千於循潮二州邀遮臣將萬人
自大庾嶺趣廣州擊黃巢趣七喻翻巢聞臣往必當遁逃乞

勅王鐸以所部兵三萬於梧桂昭永四州守險詔不許
九月黃巢得率府率告身大怒詬執政急攻廣州即
日陷之執節度使李迢轉掠嶺南州縣巢使迢草表述
其所懷迢曰予代受國恩親戚滿朝腕可斷表不可草

朝直遙翻巢殺之

考異曰驚聽錄曰擁李迢在寇復

腕烏貫翻州方知王仙芝已山東沒陣又尚君長生送咸京遂召

李迢怒而躓害新紀十一月辛酉黃巢陷江陵殺李迢

新傳曰其十月巢據荆南脅李迢草表報天子迢不可

巢怒殺之北夢瑣言曰黃巢入廣州執李迢隨軍至荆

州令招草表述其所懷召曰某骨肉滿朝世受國

恩腕即可斷表終不為領於江津害之今從實錄

冬十月以鎮海節度使高駢為淮南節度使克鹽鐵轉運

使以涇原節度使周寶為鎮海節度使

為駢寶闢南東道行軍司馬劉巨容為節度使寶平州人也

黃巢在嶺南士卒罹瘴疫死者什三四其徒勸之北還以

圖大事巢從之自桂州編大棧數十乘暴水沿湘江而

下歷衡永州癸未抵潭州城下李係嬰城不敢出戰巢

急攻一日陷之係奔朗州

九域志自潭州至朗州三百八十餘里

巢盡殺

戍兵流尸蔽江而下尚讓乘勝進逼江陵衆號五十萬

時諸道兵未集江陵兵不滿萬人王鐸留其將劉漢宏

守江陵自帥衆趣襄陽

九域志自江陵至襄陽四百四十里帥讀曰率趣七喻翻

云

欲會劉巨容之師鐸旣去漢宏大掠江陵

考異曰舊紀廣明元年

二月巢陷潭州王鐸奔江陵奔襄陽漢宏大掠實錄閏月湖南奏黃巢賊衆自衡永州下十月二十七日攻陷

潭州新巢傳曰廣明初賊自嶺南寇湖南諸郡攻潭州
陷之舊巢傳巢欲據南海之地坐邀朝命是歲自春及
夏其衆大疫死者十三四衆勸請北歸以圖大利巢不
得已廣明元年北踰五嶺犯湖湘江浙按舊紀傳皆云
廣明元年敗王鐸今月日從實錄事從舊紀又据舊紀
傳則劉漢宏本王鐸將鐸去而漢宏留江陵大掠遂為
盜也實錄用之而於鐸奔襄陽下添先是字若鐸在江
陵漢宏時為羣盜安能入其城大掠借使漢宏先曾寇
掠江陵與黃巢事了不相干何必言後半月餘賊衆乃
據其城也吳越備史云漢宏本兗州小吏領本州兵禦
巢寇遂殺將首刼輜重而叛後命前濠州刺史崔錯招
降之据此則漢宏本羣盜也新傳用之而云鐸招降之
或者漢宏本羣盜中間降鐸為部將鐸去江陵漢
宏復大掠為盜其後又降於崔錯遂為唐臣也 焚蕩

殆盡士民逃竄山谷會大雪僵尸滿野

良居

後旬餘賊

乃至漢宏兗州人也帥其衆北歸為羣盜

帥讀曰率

閏月

丁亥朔河東節度使李蔚有疾以供軍副使李邵權觀

察留後監軍李奉臯權兵馬留後已丑蔚薨都虞候張

錯郭壯署狀糾邵

狀奏狀錯壯因署狀黜李邵而進丁球糾丑律翻

以少尹丁

球知觀察留後

十一月戊午以定州已來制置使萬

年王處存為義武節度使河東行軍司馬雁門關已來

制置使康傳圭為河東節度使

四朝志宣宗大中五年以白敏中充招討党項

行營都統制置等使制置之名始此宋朝初不常置

掌經

畫邊鄙軍旅之事政和中熙泰用兵以內侍童貫

為之迄南渡之後江淮荆蜀皆置制置使其任重矣

黃巢北趣襄陽

趣七喻翻

劉巨

容與江西招討使淄州刺史曹全最合兵屯荆門以拒

之

九域志襄陽南至荆門二百七十餘里

賊至巨容伏兵林中全最以輕

騎逆戰陽不勝而走賊追之伏發大破賊衆乘勝逐北

比至江陵

比必利翻及也九域志荆門南至江陵一百六十五里

俘斬其什七八

巢與尚讓收餘衆渡江東走或勸巨容窮追賊可盡也

巨容曰國家喜負人

喜許記翻

有急則撫存將士不愛官賞

事寧則弃之或更得罪

唐末之政誠如劉巨容之言

不若留賊以為

富貴之資衆乃止全晟度江追賊會朝廷以泰寧都將

段彥謨代為招討使全晟亦止由是賊勢復振

復扶又翻攻

鄂州陷其外郭轉掠饒信池宣歙杭十五州衆至二十

萬康傳圭自代州赴晉陽庚辰至烏城驛張錯郭晁

出迎亂刀斫殺之至府又族其家十二月以王鐸為

太子賓客分司

以江陵之敗也

初兵部尚書盧攜嘗薦高駢

可為都統至是駢將張璘等屢破黃巢乃復以攜為門

下侍郎平章事凡關東節度使王鐸鄭畋所除者多易

置之為盧攜倚高駢以誤國張本

是歲桂陽賊陳彥謙陷柳州殺

刺史董岳

廣明元年春正月乙卯朔改元沙陀入雁門闕寇忻

代二月庚戌沙陀二萬餘人逼晉陽辛亥陷太谷

宋白曰太

谷縣本漢陽邑縣隋開皇十八年改名太谷因縣西太谷為名

遣汝州防禦使博昌諸

葛爽帥東都防禦兵救河東

博昌漢古縣名後魏置樂安郡及樂安縣隋時改樂

安縣為博昌縣唐時屬青州帥讀曰率

河東節度使康傳圭專事威刑

多復仇怨強取富人財遣前遮虜軍使蘇弘軫擊沙陀

於太谷至秦城遇沙陀戰不利而還傳圭怒斬弘軫時

沙陀已還代北傳圭遣都教練使張彥球將兵三千追

之壬戌至百井

百井鎮在太原陽曲縣

軍變還趣晉陽

趣七

傳圭

閉城拒之亂兵自西明門入殺傳圭監軍周從寓自出

慰諭乃定以彥球為府城都虞候朝廷聞之遣使宣慰

曰所殺節度使事出一時各宜自安勿復憂懼

復扶又翻

左拾遺侯昌業以盜賊滿關東而上不親政事專務遊

戲賞賜無度田令攷專權無上天文變異社稷將危上

疏極諫上大怒召昌業至內侍省賜死

考異曰續寶錄云司天少

監侯昌業上疏其畧曰陛下不納李蔚杜希教之諫又曰臣乃明祈五道暗祝冥官悚息於班列之中願早過於閻浮之世又曰受爵不逢於有德之君立戟每佐於無道之主又曰不望堯舜之年得同先帝之日又曰明取尹希復指揮暗策王士成進狀強奪波斯之寶貝抑取茶店之珠珍渾取匱坊全城般運又曰莫是唐家合盡之歲為復是陛下壽足之年又曰伏惟陛下暫停戲賞救接蒼生於殿內立揭諦道場以無私財帛供養諸佛用資世祿共力攘災表奏望上龍威震怒侍臣驚悸宣徽使宣云侯昌業付內侍省候進止翌日午時又內養劉季遠宣口敕云侯昌業出自寒門擢居清近不能修慎妄奏閑詞訕謗萬乘君王毀斥百辟卿士在我彞典是不能容其侯昌業宜賜自盡北夢瑣言曰唐自廣明後閹人擅權置南北廢置使軍容田令孜有回天之

力中外側目而王仙芝黃巢剽掠江淮朝廷憂之左拾遺侯昌業上疏極言時病留中不出命于仗內戮之後有傳侯昌業疏詞不合事體其末云請開揭諦道場以銷兵厲似為庸僧偽作也必若侯昌業以此識見犯上宜其死也

上好騎射劒槊法筭

唐國子監有筭學博士掌教九章海島孫

今從之

子五曹張丘建夏侯陽周髀五經筭綴術緝古為專業皆法筭也好呼到翻

至於音律捕博無

不精妙好蹴鞠鬪雞與諸王賭我鵝一頭至五十緡考

異曰新田令攷傳帝冲駢喜鬪鵝一鵝至直五十萬錢按鵝非可鬪之物至直五十萬錢亦恐失實新傳誤也

今從續尤善擊球嘗謂優人石野猪曰朕若應擊球進

實運錄

士舉須為狀元對曰若遇堯舜作禮部侍郎恐陛下不

免駁放

駁糾駁也放黜也駁放者糾駁其非是而放黜之也駁北角翻

上笑而已度

支以用度不足奏借富戶及胡商貨財敕借其半鹽鐵

轉運使高駢上言天下盜賊蜂起皆出於饑寒獨富戶

胡商未耳乃止高駢奏改楊子院為發運使

楊子院舊置留

後今改為發運使宋朝江淮發運使本此

三月庚午以左金吾大將軍陳

敬瑄為西川節度使敬瑄許州人田令孜之兄也

田令孜本

姓陳咸通中隨義父入內侍省為宦者遂冒田姓

初崔安潛鎮許昌

許昌許州也忠武節

度治令孜為敬瑄求兵馬使安潛不許敬瑄因令孜得

隸左神策軍數歲累遷至大將軍令攷見關東羣盜日

熾陰為幸蜀之計奏以敬瑄及其腹心左神策大將軍

楊師立牛勗羅元杲鎮三川上令四人擊球賭三川敬

瑄得第一籌

凡擊球立球門於球場設賞格天子按轡入球場諸將迎拜天子入講武榭升御座

諸將羅拜於下各立馬于球場之兩偏以俟命神策軍吏讀賞格訖都教練使放球於場中諸將皆驟馬趨之以先得球而擊過球門者為勝先勝者得第一即以為籌其餘諸將再入場擊球其勝者得第二籌焉

西川節度使代安潛 辛未以門下侍郎同平章事鄭

從謹同平章事充河東節度使康傳圭既死河東兵益

驕故以宰相鎮之使自擇參佐從讜奏以長安令王調

為節度副使前兵部員外郎史館修撰劉崇龜為節度

判官前司勳員外郎史館修撰趙崇為觀察判官前進

士劉崇魯為推官

進士及第而於時無官謂之前進士

時人謂之小朝廷

言名士之多也崇龜崇魯政會之七世孫也

劉政會唐初功臣

時承晉陽新亂之後日有殺掠從讜貌溫而氣勁多謀

而善斷

斷丁亂翻

將士欲為惡者從讜輒先覺誅之奸軌惕

息

惕他歷翻

為善者撫待無疑如張彥球有方畧百井之變

非其本心獨推首亂者殺之召彥球慰諭悉以兵柄委

之軍中由是遂安彥球為從謹盡死力

為于偽翻

卒獲其用

卒子恤翻

淮南節度使高駢遣其將張璘等擊黃巢屢捷

盧攜奏以駢為諸道行營都統

駢上表及答詔云今以

卿為諸道行營都統應行營將士兵馬悉受指揮詔旨

未到之間朝廷猜貳續敕却不許行軍只令固守封疆

不得擅行征討於是高駢乃引淮水繞江都城三里坐

甲不討黃巢自此轉盛舊紀傳王鐸出鎮荆南亦為諸

道行營都統而實錄及新紀表皆云為南面行營都統

舊紀乾符四年六月以駢為鎮海節度使江西招討使

六年十月以駢為淮南節度使江南行營招討使廣明

元年三月朝廷以鐸統衆無功乃授駢諸道行營兵馬

都統駢傳四年為鎮海節度使兵馬都統如故盧攜傳曰及王鐸六
年冬徙淮南節度使兵馬都統如故盧攜傳曰及王鐸六
失守罷都統以高駢代之實錄五年六月駢移鎮海六
年正月以駢為諸道行營兵馬都統仍賜詔如寶運錄
所載者八月駢上表亦如之十月駢徙淮南依前充都
統按駢表請追郎幼復備守浙西則是在鎮海時也詔
云周旋六鎮則是駢已移淮南後也六鎮謂安南天平
西川荆南鎮海淮南也又詔云今以卿為諸道都統則
似移淮南後方為都統也疑駢在浙西方為招討使既
數破巢軍乃以減巢為已任上表請布置諸軍自攻巢
于廣州及王鐸敗盧攜遂以駢代之攜欲重其權故為
諸道都統若駢先為諸道都統鐸但為南面都統則鐸
已在駢統下可以指揮不須云乞降敕指揮鐸也且鐸
自宰相都統諸將討賊故立都統之名不應同時有兩
都統也其在浙西領江西招討使者時黃巢駢乃傳檄
方掠虔吉饒信故也今從舊紀及盧攜傳

徵天下兵且廣召募得土客之兵共七萬

土兵謂淮南之兵也客兵

謂諸道之兵也

威望大振朝廷深倚之

為朝廷為駢所誤張本

安南軍

亂節度使曾衮出城避之諸道兵戍邕管者往往自歸

夏四月丁酉以太僕卿李琢為蔚朔等州招討都統

行營節度使琢聽之子也

聽李晟之子曰琢作琢者誤也

考異

張璘

度江擊賊帥王重霸降之

帥所類翻重直龍翻

屢破黃巢軍巢退

保饒州別將常宏以其衆數萬降

降戶璘

攻饒州克之

巢走時江淮諸軍屢奏破賊率皆不實宰相已下表賀朝

廷差以自安

賈誼有言厝火積薪之下火未及然因謂之安唐則薪已然矣尚可以自安邪

以李琢為蔚朔節度使仍充都統

以楊師立為東川

節度使牛勗為山南西道節度使

田令孜之志也

以諸葛英

為北面行營副招討

初劉巨容既還襄陽

還襄陽見上年

荆

南監軍楊復光以忠武都將宋浩權知府事泰寧都將

段彥謩以兵守其城詔以浩為荆南安撫使彥謩恥居

其下浩禁軍士翦伐街中槐柳彥謩部卒犯令浩杖其

背彥謩怒挾刃馳入并其二子殺之復光奏浩殘酷為

衆所誅詔以彥譽為朗州刺史以工部侍郎鄭紹業為

荊南節度使五月丁巳以汝州防禦使諸葛爽為振

武節度使劉漢宏之黨浸盛侵掠宋兗甲子徵東方

諸道兵討之

東方諸道宣武忠武義成
天平泰寧平盧感化也

黃巢屯信州

遇疾疫卒徒多死張璘急擊之巢以金啗璘

啗徒
濫翻

且致

書請降於高駢求保奏駢欲誘致之許為之求節鉞

降戶

江翻誘音酉
為于偽翻

時昭義感化義武等軍皆至淮南駢恐分

其功乃奏賊不日當平不煩諸道兵請悉遣歸朝廷許

之賊訶知諸道兵已北度淮

訶又火翻
又火翻

乃告絕於駢且

請戰駢怒令璘擊之兵敗璘死巢執復振

復扶又翻
考異曰舊紀

是歲春末賊在信州疫癘其徒多喪淮南將張璘急擊之賊懼以金啗璘仍致書高駢乞保明歸國駢信之許求節鉞時昭義武寧義武等軍兵馬數萬赴淮南駢欲收功於已乃奏賊已將殄滅不假諸道之師並遣還淮北賊知諸軍已退以求節鉞不獲暴怒與駢絕請戰駢怒令張璘整軍擊之為賊所敗臨陣殺璘賊遂乘勝度江攻天長六合等縣駢不能拒但自固而已朝廷聞賊復振大恐高駢傳曰廣明元年夏黃巢自嶺表北趨江淮由採石渡江璘勒兵天長欲擊之黃巢傳曰巢乃渡淮偽降於駢駢遣將張璘率兵受降於天長鎮巢擒璘殺之實錄五月璘已為巢所殺七月巢乃過江其言璘所以死與舊紀同新紀傳皆與實錄同据舊傳則璘死在

江北也舊紀及實錄新紀傳璘死在江南也按璘已死巢又陷睦州婺州宣州然後度江璘死在江南是也

乙亥以樞密使西門思恭為鳳翔監軍丙子以宣徽

使李順融為樞密使皆降白麻於閤門出案與將相同

唐制凡拜將相先一日中書納案遲明降麻於閤門出案會要凡將相翰林學士草制謂之白麻韋執誼翰林故事曰故事中書省用黃白二麻為綸命重輕之辨近者所出獨得黃麻其白麻皆在翰林院自非國之重事拜授將相德音赦宥則不得由于斯史言唐末宦官恣橫監軍與樞密使恩數埒於將相程大昌曰凡欲降白麻若商量於中書門下省皆前一日進文書然後付翰林草麻制注已前見

西川節度使

陳敬瑄素微賤報至蜀蜀人皆驚莫知為誰有青城妖

人乘其聲執帥其黨詐稱陳僕射

青城縣漢江源縣地南齊置齊基縣後周

改為青城以縣西北三十二里有青城山也唐屬蜀州九域志縣在州北五十里帥讀曰率

馬步使

瞿大夫覺其妄

馬步使掌馬步軍蓋唐末節度牙前職也

執之沃以狗血即

引服悉誅之六月庚寅敬瑄至成都

考異曰錦里者舊傳云敬瑄九月

二十五日上任按實錄敬瑄除西川在三月庚午又雲南事狀敬瑄與布燮以下牒云某謬膺朝寄獲授藩條

以六月八日到鎮上訖今從之

黃巢別將陷睦州婺州

睦婺相去一百八十里

盧攜病風不能行謁告

謁告謂請假居私第養疾也

己亥始入對敕

勿拜遣二黃門掖之攜內挾田令孜外倚高駢上寵遇

甚厚由是專制朝政高下在心

朝直遙翻

既病精神不完事

之可否決於親吏楊溫李修貨賂公行豆盧瑑無他材

專附會攜崔沆時有啓陳常為所沮

沮在呂翻

庚子李瑑

奏沙陀二千來降瑑時將兵萬人屯代州

降戶江翻將即亮翻下同

與盧龍節度使李可舉吐谷渾都督赫連鐸共討沙陀

李克用遣大將高文集守朔州自將其衆拒可舉於雄

武軍鐸遣人說文集歸國

說式芮翻

文集執克用將傅文達

與沙陀酋長李友金薩葛都督米海萬安慶都督史敬

存皆降於琢開門迎官軍

前慈由翻長知兩翻薩桑葛
翻考異曰實錄六月云國

昌遣文達守蔚州七月云李琢赫連鐸奏破沙陀於蔚
州降傳文達等薛居正五代史記武皇令軍使傳文達
起兵於蔚州高文集縛送李琢按國昌友金克用之族
時在蔚州何必令文達守之今從薛史

父也 庚戌黃巢攻宣州陷之 劉漢宏南掠申光

趙宗政之還南詔也西川節度使崔安潛表以崔澹之

說為是

崔澹議見
上五年

且曰南詔小蠻本雲南一郡之地

劉蜀

分建寧永昌
置雲南郡

今遣使與和彼謂中國為怯復求尚主

復扶

又翻何以拒之上命宰相議之盧攜豆盧瑑上言大中之

末府庫充實自咸通以來蠻兩陷安南邕管一入黔中

四犯西川

咸通元年蠻陷安南二年陷邕州四年又陷安南進逼邕管明年又圍邕州十四年寇黔

中咸通二年寇雋州四年寇西川六年陷雋州十五年寇西川明年逼成都乾符元年寇西川事並見前紀

徵兵運糧天下疲弊踰十五年租賦大半不入京師三

使內庫由茲空竭

度支部鹽鐵謂之三使

戰士死於瘴癘百姓困

為盜賊致中原榛杞皆蠻故也前歲冬蠻不為寇由趙

宗政未歸去歲冬蠻不為寇由徐雲虔復命蠻尚有覲

望今安南子城為叛卒所據節度使攻之未下

節度使謂曾家

自餘戍卒多已自歸

事見上三月

邕管客軍又減其半冬期

且至儻蠻寇侵軼何以枝梧不若且遣使臣報復縱未
得其稱臣奉貢且不使之懷怨益深堅決犯邊則可矣

乃作詔賜陳敬瑄許其和親不稱臣

考異曰實錄六月丙申陳敬瑄奏

請遣使和蠻丁酉中書奏請令百官集議甲辰百官議定壬子中書奏遣使按敬瑄此月八日上丙申乃十四日也奏報豈能遽至今不取新傳先是南詔知蜀強故襲安南陷之會西川節度使陳敬瑄申和親議時盧攜復輔政與豆盧瑑皆厚高駢乃議通和今從雲南事狀雲南事狀又曰中書奏玄宗冊蒙歸義為雲南王其子閣羅鳳和於吐蕃其孫異牟尋却歸朝廷自請改雲南王賜號南詔德宗從之至曾孫蒙豐祐杜悰奏以入朝

人多減之後索質子漸為侮慢卷末載陳敬瑄與雲南書牒或稱鶴拓或稱大封人雲南事狀不著撰人姓名似盧攜奏草也令敬瑄錄詔白并移書與之仍增賜金帛以嗣

曹王龜年為宗正少卿充使以徐雲虔為副使別遣內

使共齎詣南詔

內使即中使

秋七月黃巢自采石度江圍

天長六合

采石戍在宣州當塗縣西北渡江即和州界天寶元年分江都六合高郵三縣地置千秋

縣天寶七載改為天長六合漢堂邑縣地東晉屬泰郡北齊改泰州後周改方州隋為六合縣唐並屬揚州宋白曰六合縣春秋時楚之棠邑秦滅楚以棠邑為縣九域志天長在揚州西一百一十里六合在真州西北七

里十兵勢甚盛淮南將畢師鐸言於高駢曰朝廷倚公為

安危今賊數十萬衆乘勝長驅

謂乘殺張璘之勝勢也

若涉無人

之境不據險要之地以擊之使踰長淮不可復制

後扶又翻

下同必為中原大患駢以諸道兵已散張璘復死自度力

不能制

度徒洛翻

畏怯不敢出兵但命諸將嚴備自保而已

且上表告急稱賊六十餘萬屯天長去臣城無五十里

先是盧攜謂駢有文武長才

先悉薦翻

若悉委以兵柄黃巢

不足平朝野雖有謂駢不足恃者然猶庶幾望之

幾居希翻

及駢表至上下失望人情大駭詔書責駢散遣諸道兵

致賊乘無備度江駢上表言臣奏聞遣歸亦非自專今

臣竭力保衛一方必能濟辦但恐賊迤邐過淮

迤邐移力

紙翻宜急救東道將士善為禦備

東道謂關東諸道

遂稱風痺不

復出戰

痺必至翻已者欲賊縱橫河洛

舊駢傳駢怨朝議有不附

大將畢師鐸說駢云云駢駭然曰君言是也即令出軍有愛將呂用之以左道媚駢駢頗用其言用之懼師鐸

等立功即奪已權從容謂駢曰相公勲業高矣妖賊未殄朝廷已有間言賊若盪平則威望震主功名不賞公

安稅駕邪為公良畫莫若觀釁自求多福駢深然之乃止諸將但握兵保境而已驚聽錄朝廷議駢以文以武

國之名將今此黃巢必無喪於淮海也尋淮南表至云今大寇忽至入臣封廵未肯綿伏狼弧必能晦沉大衆

但以山東兵士屯駐揚州各思故鄉臣遂放去亦具聞
奏非臣自專今奉詔書責臣無備不合放回武勇又告
城危致勞徵兵勞於往返臣今以寡擊衆然白武經與
賊交鋒已當數陣粗成勝捷不落奸謀固護一方臣必
能了但慮寇設深計支梧官軍迤邐過淮彼岸無敵即
東道將士以至蕃臣繫朝廷速下明詔上委中書門下
速與商量表至中書咸有異議遂京國士庶浮謗日興
云淮南與巢衷私通連自固城池放賊過淮也妖亂志
曰廣明元年七月黃巢自采石北度直抵天長時城內
土客諸軍尚十餘萬皆良將勁兵議者有狂寇奔犯關
防之患悉願盡力死戰用之慮其立功之後侵奪已權
謂勃海曰黃巢起於羣盜遂至橫行所在雄藩望風瓦
解天時人事斷然可知令公既統強兵又居重地只得
坐觀成敗不可更與爭鋒若稍損威名則大事去矣勃
海深以為然竟不議出軍巢遂至北馬初巢寇廣陵也
江東諸侯以勃海屯數道勁卒居將相重任巢江海一

逋逃耳固可掉折箠而擒之及聞安然度淮由是方鎮
莫不解體按駢宿將豈不知賊過淮之後不可復制若
怨朝議不附已者則尤欲破賊立功所以間執讒慝之口
若縱賊過淮乃達足實議者之言非所以消謗也借使
駢實有意使賊震驚朝廷從而誅之則賊入汝洛之後
當晨夜追擊以爭功名豈得返坐守淮南數年逗留不
出兵乎又舊傳呂用之云恐成功不賞妖亂志云恐敗
衄稍損威名夫大功既成則有不賞之懼豈有未戰不
知勝負豫憂威望震主乎駢為都統控扼江淮而擁兵
縱賊使安然北度其於威名獨無損乎雖用之淺謀無
所不至駢自無參酌一至此邪蓋駢好驕矜大言自恃
累有戰功謂巢烏合疲弊之衆可以節鉞誘致淮南坐
而取之不意巢初無降心反為所欺張璘驍將一戰敗
死巢奄濟采石諸軍北去見兵不多狼狽惶恐自保不
暇故歛兵退縮任賊過淮非故欲縱之實不能制也盧
攜闇於知人致中原覆沒駢先銳後怯致京邑丘墟呂

用之妖妄奸回致廣陵塗炭皆人所深疾故衆惡歸焉
未必實然也又唐末見聞錄廣明二年十二月五日黃
巢傾陷京國轉牒諸軍据牒云屯軍淮甸牧馬潁陂則
似在淮南時非入長安後又續寶運錄云王仙芝既叛
自稱天補均平大將軍兼海內諸豪帥都統傳檄諸道
其文與此畧同末云願垂聽知謹告乾符二年正月三
日此蓋當時不逞之士偽作此文託於仙芝
及巢以譏斥時病未必二人實有此檄牒也 詔河南

諸道發兵屯潞水泰寧節度使齊克讓屯汝州以備黃
巢 辛酉以淄州刺史曹全勗為天平節度使兼東面

副都統 劉漢宏請降戊辰以為宿州刺史

考異曰實錄漢宏

寇擾荆襄王鐸遣前濠州刺史崔錯招之至是始歸降
辛未漢宏奏請於濠州倒戈歸降優詔褒之按鐸奔襄

陽漢宏始掠江陵叛去鐸尋分司蓋未分司時遣錯招之又戊辰漢宏除宿州云至是始降是已降也辛未又云請於濠州歸降者朝廷聞其降戊辰已除官而辛未漢宏表方至也

李克用自雄武

軍引兵還擊高文集於朔州李可舉遣行軍司馬韓玄

紹邀之於藥兒嶺

藥兒嶺在雄武軍西

大破之殺七千餘人李盡

忠程懷信皆死

盡忠懷信與克用同起兵於蔚朔者也

又敗之於雄武軍

之境殺萬人

敗補邁翻

李琢赫連鐸進攻蔚州李國昌戰敗

部衆皆潰獨與克用及宗族北入達靼

宋白曰達靼者本東北方之夷

蓋靺鞨之部也貞元元和之後奚契丹漸盛多為攻劫部衆分散或投屬契丹或依于渤海漸流徙于陰山其

俗語訛因謂之達靺唐咸通末有首領每相溫于越相溫部帳于漠南隨草畜牧李克用為吐渾所困嘗往依烏達靺善待之及授雁門節度使二相溫帥族帳以從克用收復長安逐黃巢於河南皆從戰有功由是俾牙于雲代之間詔以鐸為雲州刺史大同軍防禦使吐谷志其畜牧

渾白義成為蔚州刺史

白義成一作白義誠

薩葛米海萬為朔州

刺史加李可舉兼侍中達靺本靺鞨之別部也居于陰

山歐陽修曰靺鞨本在奚契丹東北後為契丹所攻部族分散居陰山者自號達靺洪景盧曰蕃語以華言

譯之皆得其近似耳天竺語轉而為捐篤身毒禿髮語轉而為吐蕃達靺乃靺鞨也契丹之讀如喫惟新唐書

有音冒頓讀如墨突惟晉書音義有之

後數月赫連鐸陰賂達靺使取李

國昌父子李克用知之時與其豪帥遊獵置馬鞭木葉

或懸針射之無不中

帥所類翻下同射而亦翻中竹仲翻

豪帥心服又置

酒與飲酒酣克用言曰吾得罪天子願效忠而不得今

聞黃巢北來必為中原患一旦天子若赦吾罪得與公

輩南向共立大功不亦快乎人生幾何誰能老死沙磧

邪達鞞知無留意乃止

赫連鐸蓋說誘達鞞豪帥以李克用父子才勇久留達鞞必將

并有其部落故使殺之而克用與其豪帥言欲與之南

向勤王達鞞豪帥知其志大決不肯久居陰山圖并其

部落彼既無圖我之心八月甲午以前西川節度使

我何苦殺之於是遂止

崔安潛為太子賓客分司

盧攜惡之也

九月東都奏汝州

所募軍李光庭等五百人自代州還過東都燒安喜門

焚掠市肆由長夏門去

燒洛城東北門由東南門去

黃巢衆號十

五萬曹全最以其衆六千與之戰頗有殺獲以衆寡不

敵退屯泗上

泗上即泗州

以俟諸軍至併力擊之而高駢竟

不之救賊遂擊全最破之

徐州遣兵三千赴澉水過

許昌徐卒素名凶悖

悖蒲妹翻又蒲沒翻

節度使薛能自謂前鎮

彭城

乾符初能鎮徐州今鎮許

有恩信於徐人館之毬場

館古玩翻

及暮

徐卒大譟能登子城樓問之對以供備踈闕慰勞久之

方定

勞力到翻

許人大懼時忠武亦遣大將周岌詣澠水

岌逆

及翻行未遠聞之夜引兵還比明入城

比必利翻

襲擊徐卒盡

殺之且怨能之厚徐卒也遂逐之能將奔襄陽亂兵追

殺之并其家岌自稱留後汝鄭把截制置使齊克讓恐

為岌所襲引兵還兗州

齊克讓本泰寧節度使引兵還鎮

諸道屯澠水

者皆散黃巢遂悉衆度淮所過不虜掠惟取丁壯以益

兵

志在攻長安

先是徵振武節度使吳師泰為左金吾大

將軍以諸葛爽代之

先悉薦翻

師泰見朝廷多故使軍民上

表留已冬十月復以師泰為振武節度使以爽為夏綏

節度使

夏戶雅翻

黃巢陷申州遂入潁水徐兗之境所至

吏民逃潰

羣盜陷澧州殺刺史李詢判官皇甫鎮鎮

舉進士二十三上不中第

上禮部者二十三而不中第可謂老於場屋矣上時掌翻

中竹仲翻

詢辟之賊至城陷鎮走問人曰使君免乎曰賊執

之矣鎮曰吾受知若此去將何之遂還詣賊竟與同死

士為知已死皇甫鎮有焉科舉之設為足以盡天下之士哉


欽定四庫全書

資治通鑑

五十一



資治通鑑卷二百五十三



總校官庶吉士臣侍朝

校對官檢討臣王坦修

謄錄監生臣李溥

欽定四庫全書薈要

史部

資治通鑑卷二百五十四

詳校官編修臣汪鏞



欽定四庫全書薈要卷七千二百四十

史部

資治通鑑卷二百五十四 宋 司馬光 撰

胡三省 音註

唐紀七十

起上章因敦十一月盡玄默攝提格四月凡一年有奇

僖宗惠聖恭定孝皇帝中之上

廣明元年十一月河中都虞候王重榮作亂剽掠坊市

俱空

重直龍翻剽匹妙翻

宿州刺史劉漢宏怨朝廷賞薄

漢宏降見

上卷七月賞盜而盜怨其賞薄彼果有以窺朝廷也 甲寅以漢宏為浙東觀察使

為漢宏為錢
錫所減張本

詔河東節度使鄭從謹以本道兵授諸

葛蕤及代州刺史朱玫使南討黃巢

玫莫杯翻

乙卯以代北

都統李琢為河陽節度使

代北已定李琢內徙亦以備黃巢也

初黃巢

將度淮豆盧瑑請以天平節鉞授巢

黃巢初求天平節豆盧瑑欲以是中

其欲俟其到鎮討之盧攜曰盜賊無厭

厭於鹽翻

雖與之節不

能止其剽掠

剽匹妙翻

不若急發諸道兵扼泗州汴州節度

使為都統賊既前不能入關必還掠淮浙偷生海渚耳

從之既而淮北相繼告急攜稱疾不出

錄考異曰驚聽曰宰臣豆盧

瑒奏緣淮南九驛使至泗州恐高駢固守城壘不遮截
大寇黃巢必若過淮落寇之計又徵兵不及須且誘之
請降節旄授鄆州節度使候其至止討亦不難宰相盧
攜言之不可奏以黃巢為國之患久矣昨與江西節制
擁節而行攻劫荆南却奪其節但徵諸道驍勇把截泗
州因此不發內使罷建雙旌但發使臣諸道而去尋汴
州徐州兩道告急到京報黃巢過淮盧攜託疾不出按
朝廷未嘗以江西節與巢借使與之安可復奪此驚聽
錄不足信也京師大恐庚申東都奏黃巢入汝州境 辛酉

以王重榮權知河中留後以河中節度使同平章事李

都為太子少傅

以王重榮作亂不能制故召李都以河中授之

汝鄭把截制

置都指揮使齊克讓奏黃巢自稱天補大將軍轉牒諸

軍云各宜守壘勿犯吾鋒吾將入東都即至京邑自欲

問罪無預衆人

言自欲問罪於朝廷於衆人無預也

上召宰相議之豆盧

瑑崔沆請發關內諸鎮及兩神策軍守潼關壬戌日南

至上開延英對宰相泣下

大盜將至無以禦之君相相對灑泣果何益哉

觀軍

容使田令孜奏請選左右神策軍弓弩手守潼關臣自

為都指揮制置把截使上曰侍衛將士不習征戰恐未

足用令孜曰皆安祿山構逆玄宗幸蜀以避之崔沆曰

祿山衆纔五萬比之黃巢不足言矣豆盧瑑曰哥舒翰

以十五萬衆不能守潼關

事見玄宗肅宗紀

今黃巢衆六十萬

而潼關又無哥舒之兵若令孜為社稷計三川帥臣皆

令孜腹心

謂陳敬瑄楊師立牛勗也帥所類翻

比於玄宗則有備矣上不

憚

僖宗雖曰童昏此時此意豈不知高枕京邑之為樂越在草莽之為可憂也哉禍至而後憂之則無及矣

古之明主居安而思危所以能常有其安也

謂令孜曰卿且為朕發兵守潼

關

為于偽翻

是日上幸左神策軍親閱將士令孜薦左軍馬

軍將軍張承範右軍步軍將軍王師會左軍兵馬使趙

珂

珂丘何翻

上召見三人

見賢遍翻

以承範為兵馬先鋒使兼把

截潼關制置使師會為制置關塞糧料使珂為句當寨

柵使

句古侯翻
當丁浪翻

令孜為左右神策軍內外八鎮及諸道

兵馬都指揮制置招討等使飛龍使楊復恭為副使癸

亥齊克讓奏黃巢已入東都境臣收軍退保潼關於關

外置寨將士屢經戰鬥久之資儲州縣殘破人煙殆絕

東西南北不見王人凍餒交逼兵械剝弊

剝吾官
翻鈍也

各思

鄉閭恐一旦潰去乞早遣資糧及援軍上命選兩神策

弩手得二千八百人令張承範等將以赴之

將即
亮翻

丁卯

黃巢陷東都留守劉允章帥百官迎謁巢入城勞問而

已

帥讀曰率
勞力到翻

閭里晏然允章廼之曾孫也

劉廼見二百
三十卷德宗

興元元年允章
可謂忝厥祖矣

田令孜奏募坊市人數千以補兩軍

辛未陝州奏東都已陷壬申以田令孜為汝洛晉絳同

華都統將左右軍東討

左右神策軍陝失
再翻華戶化翻

是日賊陷虢

州

九域志虢州東北
至陝州八十五里

以神策將羅元杲為河陽節度

使

羅元杲亦田
令孜之腹心

以周岌為忠武節度使

周岌既殺薛
能遂以忠武

節授之岌
逆及翻

初薛能遣牙將上蔡秦宗權調發至蔡州

調徒

弔翻自元和末廢彰義軍以蔡州屬忠武軍故得而調發之

聞許州亂託云赴難

難

旦翻選募蔡兵遂逐刺史據其城及周岌為節度使即以

宗權為蔡州刺史

為秦宗權以蔡州稱兵僭號張本

乙亥張承範等

將神策弩手發京師

將即亮翻

神策軍士皆長安富家子賂

宦官竄名軍籍厚得稟賜

稟給也稟賜猶言給賜也

但華衣怒馬

怒馬

者鞭之以發其怒而疾馳也

憑勢使氣未嘗更戰陳

更工衡翻陳讀曰陣

聞當

出征父子聚泣多以金帛雇病坊貧人代行

唐置病坊於京城以

養病人會要開元五年宋璟等奏悲田病坊從長安已來置使專知乞罷之至二十二年京城乞兒有疾病分

置諸寺病房至德二年兩京市各置普救病坊病坊之置其來久矣

往往不能操兵

操七刀翻

是日上御章信門樓臨遣之

考異曰新傳曰帝餞令致章信門資遣豐優按令

致雖為招討都統賜節賚物其實不離禁闕是日所遣者承範等耳新傳云餞令致誤也承範進言

聞黃巢擁數十萬之衆鼓行而西齊克讓以飢卒萬人

依託關外復遣臣以二千餘人屯於關上又未聞為饋

餉之計以此拒賊臣竊寒心願陛下趣諸道精兵早為

繼援

趣讀曰促

上曰卿輩第行兵尋至矣丁丑承範等至華

州會刺史裴虔餘徙宣歙觀察使軍民皆逃入華山城

中索然

華戶化翻
索管各翻

州庫唯塵埃鼠迹賴倉中猶有米千

餘斛軍士裹三日糧而行 十二月庚辰朔承範等至

潼關搜菁中

菁中草茂密處
也史炤曰林菁

得村民百許使運石汲水

為守禦之備與齊克讓軍皆絕糧士卒莫有鬪志是日

黃巢前鋒軍抵關下白旗滿野不見其際克讓與戰賊

小却俄而巢至舉軍大呼聲振河華

呼火故翻華戶化
翻華山臨河言黃

巢軍聲之盛
撼振河山也

克讓力戰自午至酉始解士卒飢甚遂誼

譟燒營而潰克讓走入關關左有谷平日禁人往來以

權征稅

權訖岳翻

謂之禁阬賊至倉猝官軍忘守之

忘丑放翻

潰

兵自谷而入谷中灌木壽藤茂密如織

灌木叢生之木壽藤即今之萬

歲藤一夕踐為坦塗承範盡散其輜囊以給士卒

輜囊謂輜重囊

索也輜重隨軍之物囊索私裝也

遣使上表告急稱臣離京六日

離力智翻

甲卒未增一人餽餉未聞影響到關之日巨寇已來以

二千餘人拒六十萬衆外軍飢潰蹋開禁阬

蹋與踏翻

臣之

失守鼎鑊甘心朝廷謀臣愧顏何寄或聞陛下已議西

巡謂議幸蜀苟鑾輿一動則上下土崩臣敢以猶生之軀奮

冒死之語願與近密及宰臣熟議

近密謂兩中尉兩樞密

急徵兵

以救關防則高祖太宗之業庶幾猶可扶持

幾居依翻

使黃

巢繼安祿山之亡微臣勝哥舒翰之死卒已賊急攻潼

關承範悉力拒之自寅及申關上矢盡投石以擊之關

外有天塹賊驅民千餘人入其中掘土填之

塹七艷翻掘其月翻

填亭年翻須臾即平引兵而度夜縱火焚關樓俱盡承範分

兵八百人使王師會守禁阬比至

比必利翻

賊已入矣壬午

旦賊夾攻潼關關上兵皆潰師會自殺承範變服帥餘

衆脫走至野狐泉遇奉天援兵二千繼至承範曰汝來

晚矣博野鳳翔軍還至渭橋

博野軍即穆宗長慶二年李寰帥以歸京師之兵也

見二百四十二卷帥讀曰率

見所募新軍衣裘溫鮮

新軍即田令孜所募坊市人以

補兩軍者也

怒曰此輩何功而然我曹反凍餒遂掠之更為

賊鄉導

鄉讀曰嚮

以趣長安

趣七喻翻

賊之攻潼關也朝廷以前

京兆尹蕭廩為東道轉運糧料使廩稱疾請休官貶賀

州司戶

賀州漢蒼梧郡之臨賀縣吳置臨賀郡唐置賀州京師東南四千一百三十里

黃巢入

華州留其將喬鈴守之

鈴其庶翻

河中留後王重榮請降於

賊降戶癸未制以巢為天平節度使甲申以翰林學士

承旨尚書左丞王徽為戶部侍郎翰林學士戶部侍郎

裴澈為工部侍郎並同平章事以盧攜為太子賓客分

司田令攷聞黃巢已入關恐天子責已乃歸罪於攜而

貶之薦徽澈為相是夕攜飲藥死澈休之從子也裴休見二

百四十九卷宣宗太中六年百官退朝聞亂兵入城布路竄匿布路分路

也朝直遙翻令攷帥神策兵五百奉帝自金光門出帥讀曰率下同

長安城西面三門北來第一門曰開遠門第二門曰金光門第三門曰延平門惟福穆澤壽四

王及妃嬪數人從行

從才用翻
下皆同

百官皆莫知之上奔馳

晝夜不息從官多不能及車駕既去軍士及坊市民競

入府庫盜金帛晡時黃巢前鋒將柴存入長安金吾大

將軍張直方帥文武數十人迎巢於霸上巢乘金裝肩

輿其徒皆被髮約以紅繒衣錦繡執兵以從甲騎如流

輜重塞塗

被皮義翻衣於既翻騎奇
計翻重直龍翻塞悉則翻

千里絡驛不絕民

夾道聚觀尚讓歷諭之曰黃王起兵本為百姓

為于非
偽翻

如李氏不愛汝曹汝曹但安居無恐巢館于田令孜第

其徒為盜久不勝富

館古玩翻勝音升

見貧者往往施與之式施

鼓翻

居數日各出大掠焚市肆殺人滿街巢不能禁尤憎

官吏得者皆殺之

上趣駱谷

趣七喻翻

鳳翔節度使鄭畋

謁上於道次

驛

考異曰續寶運錄戊子帝至駱谷壻水乃下詔與牛勗楊師立陳敬瑄云今月

七日已次駱谷壻水驛按此月庚辰朔戊子九日而詔云七日九誤為七也實錄辛卯車駕次鳳翔鄭畋候謁

於路舊畋傳云候駕於斜谷新紀辛卯次鳳翔丁酉至興元按甲申上離長安辛卯始次鳳翔太緩丁酉已至

興元太速又路出駱谷則不過鳳翔及斜谷蓋車駕涉鳳翔之境而畋往見耳非鳳翔與斜谷也實錄賊以數

萬衆西追車駕而不言追不及又不言為誰所拒而還諸書皆無之今不取

請車駕留鳳翔

上曰朕不欲密通巨寇且幸興元徵兵以圖收復卿東

扞賊鋒西撫諸蕃糾合鄰道勉建大勲畋曰道路梗澁

奏報難通請得便宜從事許之戊子上至壻水

九域志洋州興

道縣有壻水鎮相傳云仙人唐公昉盡室升天其壻不得偕升遂以名水誕矣詔牛勗楊師立

陳敬瑄諭以京城不守且幸興元若賊勢猶盛將幸成

都宜豫為備擬庚寅黃巢殺唐宗室在長安者無遺類

辛卯巢始入宮壬辰巢即皇帝位于含元殿畫皐繒為

袞衣擊戰鼓數百以代金石之樂登丹鳳樓下赦書國

號大齊改元金統謂廣明之號去唐下體而著黃家日

月以為已符瑞

著側畧翻言唐字去丑口而著黃字為廣字合日月為明字也

唐官三

品以上悉停任四品以下位如故以妻曹氏為皇后

考

異曰實錄巢傳立妻曲氏為皇后今從新傳

以尚讓為太尉兼中書令趙璋

兼侍中崔瑒楊希古並同平章事孟楷蓋洪為左右僕

射知左右軍事

蓋古蓋翻黃巢自以其軍分左右耳

費傳古為樞密使

費父

沸翻姓也

以太常博士皮日休為翰林學士

陸游老學菴筆記曰該聞錄言

皮日休陷黃巢為翰林學士巢敗被誅今唐書取其事按尹師魯作大理寺丞皮子良墓誌稱曾祖日休避廣

明之難徙籍會稽依錢氏官太常博士贈禮部尚書祖
光業為吳越丞相父璩為元帥府判官三世皆以文雄
江東據此則日休未嘗陷黃巢為其翰林學士被誅也
小說謬妄無所不有師魯文章傳世且剛正有守非欺
後世

廖邠之子也

嘗論裴延齡有直聲子恐當作孫闕時

罷浙東觀察使在長安巢得而相之

廖之在浙東也固與巢信使往來又

為之表奏朝廷

諸葛爽以代北行營兵屯櫟陽黃巢將碭山朱

溫屯東渭橋

碭山在漢碭縣界後魏置安陽縣治麻城隋開皇十八年改名碭山唐屬宋州九域

志在單州東南九十里碭徒郎翻朱溫始此

巢使溫誘說之

說式

爽遂降於

巢溫少孤貧與兄昱存隨母王氏依蕭縣劉崇家崇數

答辱之

按五代史溫凶悍無賴崇患太祖懷情不作業數答責之獨崇母憐之時時自為櫛沐戒家人

曰朱三非常人也宜善遇之數所角翻

崇母獨憐之戒家人曰朱三非常

人也汝曹善遇之

朱溫第三

巢以諸葛爽為河陽節度使爽

赴鎮羅元杲發兵拒之士卒皆弃甲迎爽元杲逃奔行

在鄭畋還鳳翔召將佐議拒賊皆曰賊勢方熾宜且

從容以俟兵集

從千容翻從容舒徐不迫之貌言欲以緩圖之

乃圖收復畋曰

諸君勸畋臣賊乎因悶絕仆地斃傷其面

鄭畋以將佐怠於勤王忠

憤之氣一時鬱勃至於悶絕而僵仆於地故斃傷其面斃則救翻斃也

自午至明旦尚未

能言會集使者以赦書至監軍袁敬柔與將佐序立宣

示代畋草表署名以謝巢監軍與巢使者宴樂奏將佐

以下皆哭使者怪之幕客孫儲曰以相公風痺不能來

故悲耳

痺必至翻

民間聞者無不泣畋聞之曰吾固知人心

尚未厭唐賊授首無日矣乃刺指血為表遣所親間道

詣行在

刺七亦翻下同間古覓翻

召將佐諭以逆順皆聽命復刺血

與盟

復扶又翻

然後完城塹繕器械訓士卒密約鄰道合兵

討賊鄰道皆許諾發兵會於鳳翔時禁兵分鎮關中者

尚數萬

禁兵分鎮關中即神策八鎮兵也

聞天子幸蜀無所歸畋使人

招之皆往從畋分財以結其心軍勢大振 丁酉車

駕至興元詔諸道各出全軍收復京師

悉所統之軍皆行謂之全軍

己亥黃巢下令百官詣趙璋第投名銜者復其官

名銜

顯官位姓名也

豆盧瑑崔沆及左僕射于琮右僕射劉鄩太子

少師裴諗御史中丞趙濛刑部侍郎李溥京兆尹李湯

扈從不及匿民間巢搜獲皆殺之廣德公主曰我唐室

之女誓與于僕射俱死執賊刃不置賊并殺之發盧攜

尸戮之於市將佐監鄭綦庫部郎中鄭係義不臣賊舉

家自殺

唐屢更喪亂至于廣明舉家殉國猶不乏人思義有結之素也

左金吾大將軍

張直方雖臣於巢多納亡命匿公卿於複壁巢殺之

初樞密使楊復恭薦處士河間張濬拜太常博士

處昌呂翺

遷度支員外郎黃巢逼潼關濬避亂商山上幸興元道

中無供頓漢陰令李康以騾負糗糧數百馱獻之

漢陰漢中

安陽縣地晉武帝改為安康縣唐至德二載更名漢陰縣屬金州九域志在州西北一百六十五里馱徒何翻

以驢馬負物為馱唐通馱每馱一百斤

從行軍士始得食上問康卿為縣

令何能如是對曰臣不及此乃張濬員外教臣上召濬

詣行在拜兵部郎中

唐諸司郎中從五品上員外郎從六品上

義武節度

使王處存聞長安失守號哭累日

號戶高翻

不俟詔命舉軍

入援遣二千人間道詣興元衛車駕

黃巢遣使調發

河中

調從鉤翻

前後數百人吏民不勝其苦

勝音升

王重榮謂

衆曰始吾屈節以紓軍府之患

屈節謂臣賊也紓商居翻緩也

今調財

不已又將徵兵吾亡無日矣不如發兵拒之衆皆以為

然乃悉驅巢使者殺之巢遣其將朱溫自同州弟黃勣

自華州合兵擊河中重榮與戰大破之獲糧仗四十餘

船遣使與王處存結盟引兵營於渭北

考異曰舊王處存傳曰時李

都守河中降賊會王重榮斬偽使通使於處存乃同盟
誓營於渭北時巢賊僭號天下藩鎮多受其偽命惟鄭
畋守鳳翔鄭從諱守太原處存王重榮首倡義舉俄而
鄭畋破賊前鋒王鐸自行在至故諸鎮翻然改圖以出
勤王之師按鐸中和二年始至於時未也王重榮傳曰
初重榮為河中馬步都虞侯巢賊據長安蒲帥李都不
能拒稱臣於賊賊為授重榮節度副使重榮以賊徵求
無已欲拒之都曰吾兵微力寡絕之立見其患願以節
鉞假公翌日都歸行在重榮知留後事乃斬賊使求援
鄰藩北夢瑣言曰重榮始為牙將黃巢犯闕元戎李都
奉偽畏重榮附者多因薦為副使一日忽謂都曰令公
助賊陷一邦於不忠而又日加箠斂衆口紛紜倏忽變

生何以過也遽命斬其偽使都無以對因以軍印授重
榮而去及都至行在朝廷又以前京兆尹竇滔間道至
河中代都重榮迎之滔前為京兆尹有慘酷之名時謂
之朶疊及至翌日進軍校于庭謂曰天子命重臣作鎮
將遏賊衝安可輕議斥逐令北門出去且為惡者必一
兩人而已爾等可言之滔不知軍校皆重榮之親黨也
衆皆不對重榮乃屏肅佩劔歷階而上謂滔曰為惡者
非我而誰遂召滔之僕吏控馬及階請依李都前例乃
云速去滔不敢仰視躍馬復由北門而出新傳取之按
十一月辛亥朔重榮已作亂掠坊市辛酉以重榮為留
後都為太子少傅則都已去河中矣及黃巢犯
闕都何嘗奉偽亦未嘗聞以滔代都今不取

陳敬

瑄聞車駕出幸遣步騎三千奉迎表請幸成都時從兵

浸多興元儲侍不豐

侍丈里翻

田令孜亦勸上上從之

中和元年

是年七月方改元

春正月車駕發興元加牛勗同平

章事陳敬瑄以扈從之人驕縱難制

從才用翻

有內園小兒

先至成都

唐時給役於坊廡及內園者皆謂之小兒

遊於行宮笑曰人言西

川是蠻今日觀之亦不惡敬瑄執而杖殺之

考異曰新傳曰敬

瑄殺

五十人尸諸衢錦里耆舊傳曰有內園小兒三箇

連手行速行宮數內一人笑云云巡者亂打執之敬瑄

咄曰今日且欲棒殺汝三五十輩必不令錯按三

五十輩者敬瑄語也非實在五十人也新傳誤由是

衆皆肅然敬瑄迎謁於鹿頭關辛未上至綿州東川節

度使楊師立謁見

東川治梓州北至綿州一百六十八里見賢遍翻

壬申以工

部侍郎判度支蕭邁同平章事

鄭畋約前朔方節度

使唐弘夫涇原節度使程宗楚同討黃巢巢遣其將王

暉齋詔召畋畋斬之遣其子凝績詣行在凝績追及上

於漢州

自綿州西南至漢州一百九十里

丁丑車駕至成都

自漢州西南至

成都八十五里館於府舍

館古玩翻就西川府舍為行宮

上遣使趣高駢討

黃巢

趣讀曰促

道路相望駢終不出兵上至蜀猶冀駢立功

詔駢巡內刺史及諸將有功者自監察至常侍聽以墨

勅除訖奏聞

裴澈自賊中奔詣行在時百官未集乏

人草制右拾遺樂朋龜謁田令孜而拜之由是擢為翰林學士張濬先亦拜令孜令孜嘗召宰相及朝貴飲酒

林學士張濬先亦拜令孜令孜嘗召宰相及朝貴飲酒

朝直濬恥於衆中拜令孜乃先謁令孜謝酒及賓客畢

集令孜言曰令孜與張郎中清濁異流嘗蒙中外謂與

之相既慮玷辱何憚改更更工今日於隱處謝酒則又

不可濬慙懼無所容 二月乙卯朔以太子少師王鐸

守司徒兼門下侍郎同平章事 丙申加鄭畋同平章

事 加淮南節度使高駢東面都統加河東節度使鄭

從諫兼侍中依前行營招討使代北監軍陳景思

異曰考

實錄作景斯今從薛居正五代史

帥沙陀酋長李友金及薩葛安慶吐

谷渾諸部入援京師

師讀曰率酋慈由翻長知兩翻薩桑葛翻

至絳州將濟

河絳州刺史瞿稹亦沙陀也

瞿權俱翻稹止忍翻

謂景思曰賊勢

方盛未可輕進不若且還代北募兵遂與景思俱還雁

門以樞密使楊復光為京西南面行營都監黃巢

以朱溫為東南面行營都虞候將兵攻鄧州三月辛亥

陷之執刺史趙戒因戍鄧州以扼荆襄

九域志鄧州南至襄州一百八

十里襄州南至荊州四百五十七里

壬子加陳敬瑄同平章事甲寅敬

瑄奏遣左黃頭軍使李鋌將兵擊黃巢

西川黃頭軍崔安潛所置也事

始見上卷乾符六年鋌時延翻

辛酉以鄭畋為京城四面諸軍行營

都統賜畋詔凡蕃漢將士赴難有功者

難方旦翻

並聽以墨

勅除官畋奏以涇原節度使程宗楚為副都統前朔方

節度使唐弘夫為行軍司馬黃巢遣其將尚讓王播帥

衆五萬寇鳳翔

王播新書作王璠

畋使弘夫伏兵要害自以兵

數千多張旗幟踈陳於高岡

陳讀日陣

賊以畋書生輕之鼓

行而前無復行伍

剛行伍翻

伏發賊大敗於龍尾陂

新舊書皆作龍

尾陂惟舊紀作陂鳳翔府岐山縣唐初治張堡武德七年移治龍尾城在平陽故城之東北

斬首二

萬餘級伏尸數十里

有書尚書省門為詩以嘲賊者

尚讓怒應在省官及門卒悉抉目倒懸之

決於翻

大索城

中能為詩者

索山客翻

盡殺之識字者給賤役凡殺三千餘

人瞿稹李友金至代州募兵踰旬得三萬人皆北方

雜胡屯於崞西

代州崞縣之西也崞音郭

獷悍暴橫

獷古猛翻悍下罕翻又侯幹翻

橫戶稹與友金不能制友金乃說陳景思曰

說式

金雖

有衆數萬苟無威信之將以統之終無成功吾兄司徒

父子勇略過人為衆所服驃騎誠奏天子赦其罪召以

為帥李國昌以平龐勛功檢校司徒驃騎唐制武散階極品唐自高力士以來宦官多官至驃騎故以稱

景思則代北之人一麾響應狂賊不足平也景思以為然

遣使詣行在言之詔如所請友金以五百騎齎詔詣達

靺迎之李克用入達靺見李克用帥達靺諸部萬人赴

之考異曰實錄陳景斯齋詔入達靺召李克用軍屯蔚州克用因大掠雁門以北軍鎮薛居正五代史先

是景思與李友金發沙陀諸部五千騎南赴京師友金即武皇之族父也中和元年二月友金軍至絳州將度

河刺史瞿稹謂景思曰巢賊方盛不如且還代北徐圖
利害四月友金旋軍雁門瞿稹至代州半月之間募兵
三萬營於崞縣之西其軍皆北邊五部之衆不開軍法
瞿稹李友金不能制友金謂景思云云景思然之促奏
行在天子乃以武皇為雁門節度使仍令以本軍討賊
李友金發五百騎齎詔召武皇於達靺武皇即帥達靺
諸部萬人趨雁門按景思請赦國昌父子而克用至者
蓋國昌已老獨使克用來耳是歲克用但攻掠太原又
陷忻代二州明年十二月始自忻代留後除雁門節度
使蓋此際止赦其罪復為大同防禦使乃陷忻代自稱
留後朝廷再召之始除雁門薛史誤也新表中和二年
以河東忻代二州隸雁門節度更大同節度為雁門節
度治代州

此其證也

羣臣追從車駕者稍集成都南北司朝者

近二百人

近其朝直遙翻

諸道及四夷貢獻不絕蜀中府庫

充實與京師無異賞賜不乏士卒欣悅 黃巢得王徽

逼以官徽陽瘖不從月餘逃奔河中遣人間道奉絹表

詣行在間古詔以徽為兵部尚書 前夏綏節度使諸

葛爽復自河陽奉表自歸去年黃巢入關即以為河陽

節度使 宥州刺史拓跋思恭開元十六年以六胡州

理經畧軍後移治長澤縣長澤漢朔方郡三封縣地

考異曰歐陽修五代史作拓跋思敬意謂薛史避國諱

耳按舊唐書實錄皆作思恭實錄天復二年九月武定

軍節度使李思敬以城降王建思敬本姓拓跋廊夏節

度使思恭保大節度使思孝之弟也思孝致仕以思敬

為保大留後遂升節度又徙武定軍新唐書党項傳曰

思恭為定難節度使卒弟思諫代為節度思孝為保大節度以老薦弟思敬為保大留後俄為節度然則思恭思敬乃是兩人思敬後附李茂貞或賜

本党項羌也

新書

党項以姓別為部落而拓跋氏最彊

糾合夷夏兵會鄜延節度使李孝昌

於鄜州同盟討賊

夏戶雅翻鄜音夫

奉天鎮使齊克儉遣使詣

鄭畋求自效甲子畋傳檄天下藩鎮合兵討賊時天子

在蜀詔令不通天下謂朝廷不能復振及得畋檄爭發

兵應之賊懼不敢復窺京西

復扶又翻

夏四月戊寅朔加

王鐸兼侍中

以拓跋思恭權知夏綏節度使

為拓跋氏彊盛

遂踰據西
夏張本

黃巢以其將王玫為邠寧節度使邠州通

塞鎮將朱玫起兵誅之

玫莫杯翻

讓別將李重古為節度使

自將兵討巢是時唐弘夫屯渭北王重榮屯沙苑王處

存屯渭橋拓跋思恭屯武功鄭畋屯藍屋弘夫乘龍尾

之捷進薄長安壬午黃巢帥衆東走程宗楚先自延秋

門入

長安苑城有門西出謂之延秋門

弘夫繼至處存帥銳卒五千夜

入城

帥讀曰率下同

坊市民喜爭譟呼出迎官軍

謹讀曰喧

或以瓦

礮擊賊

礮狼伏翻

或拾箭以供官軍宗楚等恐諸將分其功

不報鳳翔廊夏

斷句

軍士釋兵入第舍掠金帛妓妾

妓渠綺翻

處存令軍士繫白帶為號

帶詢趨翻繒頭也

坊市少年

或竊其號以掠人賊露宿霸上

宿無屋廬曰露宿

訶知官軍不

整

詞翻正翻又火迎翻

且諸軍不相繼引兵還襲之自諸門分入

大戰長安中宗楚弘夫死

考異曰舊紀傳新傳皆云弘夫敗在二年六月驚聽錄

唐年補錄新紀實錄皆在此年四月新紀日尤詳今從之

軍士重負不能走是以甚

敗死者什八九處存收餘衆還營丁亥巢復入長安怒

民之助官軍縱兵屠殺流血成川謂之洗城於是諸軍

皆退賊勢愈熾賊所署同州刺史王溥華州刺史喬謙
商州刺史宋巖聞巢奔長安皆率衆奔鄧州朱溫斬溥
謙釋巖使還商州 庚寅拓跋思恭李孝昌與賊戰於

王橋不利 詔以河中留後王重榮為節度使 賊衆

上黃巢尊號曰承天應運啓聖睿文宣武皇帝 有雙

雉集廣陵府舍占者以為野鳥來集城邑將空之兆高

駢惡之

惡鳥
路翻

乃移檄四方云將入討黃巢悉發巡內兵

八萬舟二千艘旌旗甲兵甚盛五月乙未出屯東塘

東塘

在今揚州城東即今灣頭至宜陵一帶塘岸也般蘇遭
翻考異曰妖亂志曰自五月十二日出東塘至九月

六日歸府九十餘日禳雉雒之變也按五月十二日至
九月六日乃是一百六十三日非九十餘日今從舊傳

諸將數請行期

數所角翻

駢託風濤為阻或云時日不利竟

不發李克用牒河東稱奉詔將兵五萬討黃巢令具

頻遞

緣道設酒食以供軍為頻置郵驛為遞

鄭從讜閉城以備之克用屯

於邠東從讜犒勞

犒口到翻勞力到翻

給其資糧累日不發克用

自至城下大呼

呼火故翻

求與從讜相見從讜登城謝之癸

亥復求發軍賞給

復扶又翻

從讜以錢千緡米千斛遺之

遺唯

季翻甲子克用縱沙陀剽掠居民剽城中大駭從謹求

救於振武節度使契苾璋

契苾

璋引突厥吐谷渾救之

破沙陀兩寨克用追戰至晉陽城南璋引兵入城沙陀

掠陽曲榆次而戰黃巢之克長安也忠武節度使周

岌降之

去年十一月而黃巢克長安

岌嘗夜宴急召監軍

楊復光

先是以楊復光為忠武監軍屯鄧州扼賊右衝巢既陷長安遣朱溫屯鄧州復光遂至許州依

周岌故召

左右曰周公臣賊將不利於內侍不可往

唐

侍省以內侍監為之長內復光曰事已如此義不圖全

侍為貳故左右以稱復光

即詣之酒酣发言及本朝

朝直

復光泣下良久曰丈夫

所感者恩義耳公自匹夫為公侯奈何捨十八葉天子

而臣賊乎

自高祖至僖宗十八世

发亦流涕曰吾不能獨拒賊故

貌奉而心圖之今日召公正為此耳

偽于

因瀝酒為盟

史炤曰以酒滴瀝也

是夕復光遣其養子守亮殺賊使者於驛時

秦宗權據蔡州不從发命復光將忠武兵三千詣蔡州

說宗權同舉兵討巢

說式

宗權遣其將王淑將兵三千

從復光擊鄧州逗留不進復光斬之併其軍分忠武八

千人為八都遣牙將鹿晏弘晉暉王建韓建張造李師

泰龐從等八人將之

考異曰劉昫十國紀年上云八都而下止有王建等七人姓名諸

書

不可考故也王建始此

王建舞陽人韓建長社人晏弘暉造師

秦皆許州人也復光帥八都與朱溫戰敗之

師讀曰率敗補遣翻

遂克鄧州逐北至藍橋而還

藍橋在藍田關南還從宣翻又如字

昭義

節度使高潯會王重榮攻華州克之

六月戊戌以鄭

畋為司空兼門下侍郎同平章事都統如故

李克用

遇大雨引兵北還陷忻代二州因留居代州

考異曰唐末見聞

錄六月三十日沙陀軍却回叔却忻代州太祖紀年錄
遇大雨六月二十三日班師雁門薛居正五代史與紀

年錄同按忻代先屬河東中和二鄭從讜遣教練使論
年始割隸雁門今從見聞錄實錄

安等軍百井以備之 邠寧節度副使朱玫屯興平

縣在長安西八十五里余黃巢將王播圍興平玫退屯
靖曰周文丘今之興平

奉天及龍尾陂 西川黃頭軍使李鋌將萬人鞏咸將

五千人鞏姓也周卿士鞏屯興平為二寨與黃巢戰屢

捷陳敬瑄遣神機營使高仁厚將二千人益之神機營
亦崔安

潛置事見上 秋七月丁巳改元赦天下 改元
卷乾符六年 中和 庚申

以翰林學士承旨兵部侍郎韋昭度同平章事 論安

自百井擅還鄭從謹不解韓衫斬之滅其族

韓與靴同考異曰

唐末見聞錄六月三十日沙陀叔却忻代州使司差教練使論安軍使王蟾高弁回鶻吐蕃等軍於百井下寨守禦當月內論安等拔寨却迴到府按當月內即三十日也一日之中不容有爾許事必非也又曰至七月十四日相公排飯大將等於坐上把起論安不脫靴於毬場內處置族滅其家又差都頭溫漢臣將兵依前於百井下寨當月契苾尚書領兵馬却歸振武今從之更遣都頭溫漢臣將兵屯百

井契苾璋引兵還振武

初車駕至成都蜀軍賞錢人

三緡田令孜為行在都指揮處置使每四方貢金帛輒

頒賜從駕諸軍無虛月不復及蜀軍

復扶又翻

蜀軍頗有怨

言丙寅令孜宴土客都頭

土軍蜀軍客軍從駕諸軍唐之中世以諸軍總帥為都頭

至其後也一部之軍謂之一都其部帥呼為都頭

以金杯行酒因賜之諸都頭

皆拜而受西川黃頭軍使郭琪獨不受起言曰諸將月

受俸料豐贍有餘常思難報豈敢無厭

俸扶用翻厭於鹽翻

顧蜀

軍與諸軍同宿衛而賞賚懸殊頗有舛望

舛古穴翻怨望

恐萬

一致變願軍容減諸將之賜以均蜀軍使土客如一則

上下幸甚令孜默然有間曰

間如字

汝嘗有何功對曰琪

生長山東

長知兩翻

征戍邊鄙嘗與党項十七戰契丹十餘

戰

契欺訖翻

金創滿身

創初良翻

又嘗征吐谷渾傷脇腸出線縫

復戰

復扶又翻

令孜乃自酌酒於別樽以賜琪琪知其毒不

得已再拜飲之歸殺一婢吮其血以解毒吐黑汁數升

吮如究翻吐土故翻

遂帥所部作亂

帥讀日率

丁卯焚掠坊市令孜奉

天子保東城閉門登樓命諸軍擊之琪引兵還營陳敬

瑄命都押牙安金山將兵攻之琪夜突圍出奔廣都

隋改

廣都縣為雙流縣唐龍朔二年復分雙流置廣都縣屬成都府九域志在府西四十五里

從兵皆潰

從才用翻獨廳吏一人從息於江岸琪謂廳吏曰陳公知吾

無罪然軍府驚擾不可以莫之安也汝事吾能始終今
有以報汝汝齎吾印劔詣陳公曰郭琪走度江我以劔
擊之墜水尸隨湍流下矣得其印劔以獻陳公必據汝
所言榜懸印劔於市以安衆汝當獲厚賞吾家亦保無
恙吾自此適廣陵歸高公言欲奔揚州歸高駢也後數月汝可密
以語吾家也語牛倨翻遂解印劔授之而逸廳吏以獻敬瑄

果免琪家上日夕專與宦者同處議天下事待外臣殊

疎薄

處昌呂翻外臣謂外廷之臣宰相以下百執事皆是也

庚午左拾遺孟昭圖

上疏以為治安之代遐邇猶應同心

治直吏翻

多難之時中

外尤當一體

難乃旦翻

去冬車駕西幸不告南司遂使宰相

僕射以下悉為賊所屠

謂豆盧瑑崔沆及于琮等也

獨北司平善況

今朝臣至者皆冒死崎嶇遠奉君親所宜自茲同休等

戚伏見前夕黃頭軍作亂陛下獨與令孜敬瑄及諸內

臣閉城登樓並不召王鐸已下及收朝臣入城翌日又

不對宰相又不宣慰朝臣

翌日明

臣備位諫官至今未

知聖躬安否況疎宄乎

宄而隲
翻散也

儻羣臣不顧君上罪固

當誅若陛下不恤羣臣於義安在夫天下者高祖太宗

之天下非北司之天下天子者四海九州之天子非北

司之天子北司未必盡可信南司未必盡無用豈天子

與宰相了無關涉朝臣皆若路人如此恐收復之期尚

勞聖慮尸祿之士得以宴安臣躬被寵榮

被皮
義翻

職在裨

益雖遂事不諫而來者可追

二語皆本
之論語

疏入令攷屏不

奏屏必
邦翻辛未矯詔貶昭圖嘉州司戶遣人沉於墓願津

墓頤山在眉州眉山東七里山狀如墓頤因名山臨江津今有孟拾遺祠墓謨加翻聞者氣塞而

莫敢言

天子殺諫臣者必亡其國以聞官而專殺諫臣自古以來未之有也此不特害于而國實亦凶

于而身是以唐未亡而令致之身先亡也塞悉則翻

鄜延節度使李孝昌權夏

州節度使拓跋思恭屯東渭橋黃巢遣朱溫拒之以義

武節度使王處存為東南面行營招討使以邠寧節度

副使朱玫為節度使 八月己丑夜星交流如織或大

如杯椀至丁酉乃止

武寧節度使支詳

按新書方鎮表懿宗咸通

十一年復徐州節鎮賜號感化軍自此迄於天復未嘗復武寧舊額以下文以感化留後時溥為節度使證之

武寧誤也當作感化

遣牙將時溥陳璠將兵五千入關討黃巢

璠字

表翻

二人皆詳所獎拔也溥至東都矯稱詳命召師還與

璠合兵屠河陰掠鄭州而東及彭城詳迎勞犒賞甚厚

璠音番勞力到翻

溥遣所親說詳曰

說式芮翻

衆心見迫請公解印

以相授詳不能制出居大彭館溥自知留務璠謂溥曰

支僕射有惠於徐人不殺必成後悔溥不許送詳歸朝

朝直遙翻

璠伏甲於七里亭

亭去彭城七里因名

并其家屬殺之詔以

溥為武寧留後溥表璠為宿州刺史璠到官貪虐溥以

都將張友代還殺之

楊復光奏升蔡州為奉國軍以

秦宗權為防禦使壽州屠者王緒與妹夫劉行全聚衆

五百盜據本州月餘復陷光州

復扶又翻下同

自稱將軍有衆

萬餘人秦宗權表為光州刺史固始縣佐王潮

世率以縣丞為

縣佐唐制諸縣丞簿尉之下有司功佐司倉佐司戶佐司兵佐司法佐司士佐皆縣佐也路振九國志王潮少為縣佐史或者傳寫逸史字歟及弟審邽審知皆以材氣知名緒以潮

為軍正使典資糧閱士卒信用之

王潮兄弟始此為潮廢緒張本

高

潯與黃巢將李詳戰于石橋

石橋即晉將鎮惡破秦兵處

潯敗奔河

中詳乘勝復取華州

是年五月高
澤克華州

巢以詳為華州刺史

以權知夏綏節度使拓跋思恭為節度使 宗正少

卿嗣曹王龜年自南詔還驃信上表款附請悉遵詔旨

龜年使南詔見上卷廣
明元年六月上時掌翻

李孝昌拓跋思恭與尚讓朱

溫戰于東渭橋不利引去

史言諸鎮之勤王者
皆以師老遷延引退

初高

駢與鎮海節度使周寶俱出神策軍駢以兄事實及駢

先貴有功浸輕之既而封壤相鄰數爭細故遂有隙

淮南

與鎮海軍鄰壤止一
江為界耳數所角翻

駢檄寶入援京師寶治舟師以俟

之治直怪其久不行訪諸幕客或曰高公幸朝廷多故

有并吞江東之志聲云入援其實未必非圖我也宜為

備寶未之信使人覘駢殊無北上意覘丑廉翻上時掌

勤王為會駢使人約寶面會瓜洲議軍事寶遂以言者

為然辭疾不往且謂使者曰吾非李康高公復欲作家

門功勲以欺朝廷邪高崇文斬李康事見二百三駢怒

復遣使責寶何敢輕侮大臣復扶寶詬之曰彼此夾江

為節度使汝為大臣我豈坊門卒邪詬古候翻又許候

夷非有貴賤之異也長安城中百坊坊皆有垣有門門皆有守卒

由是遂為深仇駢留

東塘百餘日詔屢趣之

趣讀曰促

駢上表託以寶及浙東觀

察使劉漢宏將為後患辛亥復罷兵還府其實無赴難

心但欲襍雉集之異耳

難乃旦翻襍如羊翻厭除也

高駢召石鏡

鎮將董昌至廣陵欲與之俱擊黃巢昌將錢鏐說昌曰

說式芮翻觀高公無討賊心不若以扞禦鄉里為辭而去之

昌從之駢聽昌還會杭州刺史路審中將之官行至嘉

興嘉興漢由拳縣吳改名唐屬蘇州在州西南百四十里昌自石鏡引兵入杭州

審中懼而還昌自稱杭州都押牙知州事遣將吏請於

周寶寶不能制表為杭州刺史 臨海賊杜雄陷台州

辛酉立皇子震為建王 昭義十將成麟殺高潯成麟

因高潯石橋橋引兵還據潞州天井關戍將孟方立起兵

攻麟殺之

考異曰實錄澤潞牙將劉廣據潞州叛天井關戍將孟方立帥戍卒攻廣殺之自稱留

後仍移軍額於邢州初高潯援京師廣帥師至陽平謀

為亂不行還據潞州自稱留後用法嚴酷三軍畏之方

立乘虛襲殺焉又曰貶昭義節度使高潯為端州刺史
中和三年實錄又曰初孟方立殺高潯自立薛居正五
代史方立傳曰中和二年為澤州天井關戍將時黃巢
犯關輔州郡易帥有同博奕先是沈詢高湜相繼為昭

義節度急於軍政及有歸秦劉廣之亂方立見潞帥交代之際乘其無備率兵徑入潞州自稱留後新紀八月昭義軍節度使高潯及黃巢戰於石橋敗績十將成麟殺潯入于潞州九月己巳昭義軍成將孟方立殺成麟自稱留後方立傳惟以成麟為成郾餘如新紀按乾符二年實錄十月昭義軍亂逐節度使高潯貶潯象州司戶柳玘傳云貶高要尉三年十一月詔魏博韓簡云劉廣逐帥擅權云云是廣逐潯擅據潞州也薛史孟方立傳亦云沈詢高潯急於軍政致有歸秦劉廣之亂是廣亂在前也舊紀九月高潯牙將劉廣擅還潞州是月潯天井關戍將孟方立攻廣殺之自稱留後貶潯端州刺史此蓋舊紀誤實錄因之薛史方立傳曰見潞帥交代之際帥兵入潞州不言何帥交代若不逐帥何能據州事無所因殊為踈略舊紀恐是誤以高潯事為高潯事實錄此云殺廣明年又云殺潯自相違新紀傳皆云成麟殺潯方立斬麟月日事實頗詳必有所出今從之

方立汧州人也

忠武監軍楊復光屯武功

永嘉賊

朱褒陷温州

宋白曰温州永嘉郡漢會稽郡之東境後漢永和四年置永嘉縣晉明帝立永嘉郡

尋屬永嘉郡隋平陳廢郡唐武德六年置東嘉州貞觀元年廢州以縣屬柘州上元二年分柘州之永嘉安固二縣置温州以

溫嶠嶺為名

鳳翔行軍司馬李昌言將本軍屯興平

時鳳翔倉庫虛竭犒賞稍薄糧饋不繼昌言知府中兵

少因激怒其衆冬十月引軍還襲府城鄭畋登城與士

卒言其衆皆下馬羅拜曰相公誠無負我曹畋曰行軍

苟能戢兵愛人為國滅賊亦可以順守矣

逐帥為逆取討賊以取旌

節為順守為于偽翻乃以留務委之即日西赴行在 天平節度

使南面招討使曹全晟與賊戰死軍中立其兄子存實

為留後 十一月乙巳孟楷朱溫襲鄆夏二軍於富平

二軍敗奔歸本道

二軍李孝昌拓跋思恭之軍也

鄭畋至鳳州

自鳳翔西

至鳳州三百九十五里

累表辭位詔以畋為太子少傅分司以李

昌言為鳳翔節度行營招討使 以門下侍郎同平章

事裴澈為鄂岳觀察使 加鎮海節度使周寶同平章

事 遂昌賊盧約陷處州

吳孫權赤烏二年分太末立平昌縣晉武帝改曰遂昌唐

武德八年併入松陽景雲元年復置遂昌縣屬處州九
域志在州西二百四十里按溫處二州本晉永嘉一郡
之地隋為括州永嘉郡唐武德置括州又分置東嘉州
始分為二州東嘉州後為溫州括州改為處州避德宗
名也 十二月江西將閔勗戍湖南還過潭州逐觀察使

李裕自為留後

考異曰實錄新傳作閔
項今從程匡衮唐補紀

以感化留

後時溥為節度使

賜夏州號定難軍

難乃
旦翻

初高駢

鎮荆南

乾符五年
駢鎮荆南

補武陵蠻雷滿為牙將領蠻軍從駢

至淮南逃歸聚衆千人襲朗州殺刺史崔翥

翥章
恕翻

詔以

滿為朗州留後歲中率三四引兵寇荆南入其郛焚掠

而去大為荆人之患。陬溪人周岳嘗與滿獵爭肉而鬪。

欲殺滿不果。

陬溪當在武陵界。陬側鳩翻。

聞滿據朗州亦聚衆襲衡。

州逐刺史徐顥詔以岳為衡州刺史。石門蠻向瓌亦集。

夷獠數千攻陷澧州殺刺史呂自牧自稱刺史。

吳分零陽縣置。

天門郡隋廢為石門縣唐屬澧州九域志在州西九十二里。

王鐸以高駢為諸道。

都統無心討賊自以身為首相發憤請行懇款流涕至。

於再三上許之。

懇款懇誠也相息亮翻。

二年春正月辛亥以王鐸兼中書令充諸道行營都都。

統考異曰舊紀中和元年七月鐸為都統十二月帥師三萬至京畿屯於藍屋舊鐸傳亦在元年唐年補

錄元年十一月乙巳制以鐸為都統十二月乙亥鐸屯藍屋續寶運錄元年八月鐸拜天下都統唐補紀中和

元年四月高駢帥師駐泊東塘自五月出府九月却歸朝廷即以鐸統諸道兵馬收復長安鐸為都統諸書年

月不同如此新紀二年正月辛亥王鐸為諸道行營都都統高駢罷都統據寶錄四月答高駢詔罷都都統當

在此年今從實錄新紀舊駢傳云僖宗知駢無赴難意乃以鐸為京城四面諸道行營兵馬都統韋昭度領江

淮鹽鐵轉運使駢既失兵柄又落利權攘袂大詬累上章自訴語詞不遜按駢罷都統依前為諸道鹽鐵轉運

使五月方罷北夢瑣言曰王鐸初鎮荆南黃巢入寇望風而遁他日將兵潼關黃巢令人傳語云相公儒生且

非我敵無污我鋒刃自取敗亡也後到成都行朝拜諸道都統所以高駢上表目之為敗軍之將也按鐸自荆

南喪師貶官未嘗將兵潼關皮光業見聞錄為都統在此年二月亦誤又舊紀傳新傳鐸止為都統新紀作都都統實錄初除及罷時皆為都統中間多云都都統又西門思恭為都都監按此時諸將為都統者甚多疑鐸為都都權知義成節度使俟罷兵復還政府高駢但領統是也

鹽鐵轉運使罷其都統及諸使聽主鐸自辟將佐以太

子少師崔安潛為副都統辛未以周岌王重榮為都都

統左右司馬諸葛爽及宣武節度使康實為左右先鋒

使時溥為催遣綱運租賦防遏使

綱運自江淮來者皆由徐州巡內故以溥

任此以右神策觀軍容使西門思恭為諸道行營都都

職

監又以王處存李孝昌拓跋思恭為京城東北西面都

統以楊復光為南面行營都監使又以中書舍人鄭昌

圖為義成節度行軍司馬給事中鄭畷為判官直弘文

館王搏為推官畷祖峻翻搏徒官翻司勳員外郎裴贇為掌書記

昌圖從謹之從祖兄弟畷畷之弟搏璵之曾孫王璵以祠禱歷

事玄肅見前紀贇坦之子也裴坦見二百五十一卷懿宗咸通十年又以陝虢觀

察使王重盈為東面都供軍使重盈重榮之兄也陝失冉翻

重直龍翻黃巢以朱溫為同州刺史令溫自取之二月同

州刺史朱誠奔河中溫遂據之

為朱溫以同州歸國張本

己卯以

太子少傅分司鄭畋為司空兼門下侍郎同平章事召詣行在軍務一以諮之以王鐸判戶部事朱溫寇河

中王重榮擊敗之

敗補邁翻

以李昌言為京城西面都統朱

玫為河南都統

朱玫時鎮邠寧安得出關東統河南諸鎮此河南蓋自龍門河東至蒲津一帶

大河南岸也

涇原節度使胡公素薨軍中請命於都統王

鐸承制以大將張鈞為留後

李克用寇蔚州

蔚紆勿翻

三

月振武節度使契苾璋奏與天德大同共討克用詔鄭

從讜與相知應接

陳敬瑄多遣人歷縣鎮訶事

訶翻 正翻

又火通翻

謂之尋事人所至多所求取有二人過資陽鎮

時

置鎮於資州資陽縣後魏分資中置資陽縣以其地在資水之陽也九域志資陽在資州西北一百二十里

獨無所求鎮將謝弘讓邀之不至自疑有罪夜亡入羣

盜中明旦二人去弘讓實無罪也捕盜使楊遷誘弘讓

出首而執以送使

首式又翻下同送使送之節度使府也使疏吏翻

云討擊擒

獲以求功敬瑄不之問杖弘讓脊二十釘於西城二七

日煎油潑之又以膠麻掣其瘡

釘丁定翻二十七十四日也潑普活翻掣尺列翻

備極慘酷見者寃之又有邛州牙官阡能

邛渠容翻考異曰張彭

錦里耆舊傳作千能句延慶錦里耆舊傳作阡能續寶運錄作阡能實錄新傳作阡能按北夢瑣言安仁土豪

阡能注云姓慕無此蓋西南夷之種今從之

因公事違期避杖亡命為盜楊

遷復誘之

復扶又翻

能方出首聞宏讓之寃大罵楊遷發憤

為盜驅掠良民不從者舉家殺之踰月衆至萬人立部

伍署職級

職級謂牙前將吏自押牙孔目官而下分職各有等級

橫行邛雅二州

間攻陷城邑所過塗地先是蜀中少盜賊

先忠薦翻少詩沼翻

自

是紛紛競起州縣不能制敬瑄遣牙將楊行遷將三千

人胡洪略莫匡時各將二千人以討之 以右神策將

軍齊克儉為左右神策內外八鎮兼博野奉天節度使

賜鄜坊軍號保大

鄜音夫

夏四月甲午加陳敬瑄兼

侍中 赫連鐸李可舉與李克用戰不利 初高駢好

神仙

好呼到翻

有方士呂用之坐妖黨亡命歸駢駢厚待之

補以軍職

妖於遙翻

用之鄆陽茶商之子也

鄆陽漢古縣唐帶饒州古縣在

今縣東界以客廣陵熟其人情爐鼎之暇

爐鼎所以鍊金石化丹砂為金銀之

類頗言公私利病故駢愈奇之稍加信任駢舊將梁纘

陳珙馮綬董瑾俞公楚姚歸禮素為駢所厚用之欲專

權浸以計去之駢遂奪續兵族珙家綬瑾公楚歸禮咸

見疎用之又引其黨張守一諸葛殷共蠱惑駢守一本

滄景村民

去羌呂翻張守一
蓋居滄景二州間

以術干駢無所遇窮困甚

用之謂曰但與吾同心勿憂不富貴遂薦於駢駢寵待

埒於用之

埒龍輟
翻等也

殷始自鄱陽來用之先言於駢曰王

皇以公職事繁重輟左右尊神一人佐公為理公善遇

之欲其久留亦可縻以人間重職明日殷謁見詭辯風

生駢以為神補鹽鐵劇職駢嚴潔甥姪輩未嘗得接坐

殷病風疽

史炤曰疽千余切又子與切痒病一本從疒從旦音多但翻又音旦釋云瘡也

搔捫

不替手膿血滿爪駢獨與之同席促膝傳杯器而食左

右以為言駢曰神仙以此試人耳駢有畜犬

搔爬也捫摸也替廢

也畜吁玉翻

聞其腥穢多來近之

近其新翻

駢怪之殷笑曰殷嘗

於玉皇前見之

道家謂天帝為玉皇大帝

別來數百年猶相識駢與

鄭畋有隙用之謂駢曰宰相有遣劔客來刺公者

刺七亦翻

今夕至矣駢大懼問計安出用之曰張先生嘗學斯術

可以禦之駢請於守一守一許諾乃使駢衣婦人之服

衣於潛於他室而守一代居駢寢榻中夜擲銅器於階

既翻

令鏗然有聲又密以囊盛彘血

鏗丘耕翻盛時征翻彘豕也

灑於庭

宇如格鬪之狀及旦笑謂駢曰幾落奴手

幾居希翻

駢泣謝

曰先生於駢乃更生之惠也厚酬以金寶有蕭勝者賂

用之求鹽城監

鹽城漢鹽漬縣地久無城邑唐武德七年置鹽城縣有監亭一百二十三有監

屬楚州九域志縣在州東南二百四十里

駢有難色用之曰用之非為勝也

為于偽翻

近得上仙書云有寶劔在鹽城井中須一靈官往

取之以勝上仙左右之人欲使取劒耳駢乃許之勝至

監數月函一銅匕首以獻用之見稽首曰

稽音啓

此北帝

所佩得之則百里之內五兵不能犯駢乃飾以珠玉常

置坐隅

坐祖卧翻

用之自謂磻溪真君謂守一乃赤松子殷

乃葛將軍勝乃秦穆公之壻也

各以其姓傳會以爲仙磻蒲官翻

用之

又刻青石為奇字云玉皇授白雲先生高駢密令左右

置道院香案駢得之驚喜用之曰玉皇以公焚修功著

將補真官計鸞鶴不日當降此際用之等謫限亦滿必

得陪幢節同歸上清耳

用之自言與守一殷等本皆神仙以謫降在人間限期既滿當

復升天列於仙官又道家之說有太清玉清上清是為三清之境幢簿江翻

是後駢於道院

庭中刻木鶴時著羽服跨之

著涉略翻

日夕齋醮鍊金燒丹

費以巨萬計用之微時依止江陽后土廟

貞觀十八年分江都置江

陽縣與江都俱在揚州郭下后土廟今揚州城東南隅蕃釐觀是也然揚州古城在蜀岡之上北連雷塘今城

周世宗所徙則此時后土廟在揚州城外也宋白曰宋武帝分江都縣置廣陵縣隋初改為江陽縣以處江之

正北故曰江陽

舉動祈禱及得志白駢崇大其廟極江南工材

之選每軍旅大事以少牢禱之

少詩照翻

用之又言神仙好

樓居

用漢方士語
好呼到翻

說駢作迎仙樓

說式
芮翻

費十五萬緡又

作延和閣高八丈

高居
傲翻

用之每對駢呵叱風雨仰揖空

際云有神仙過雲表駢輒隨而拜之然常厚賂駢左右

使伺駢動靜共為欺罔駢不之寤

伺相
吏翻

左右小有異議

者輒為用之陷死不旋踵但潛撫膺鳴指

鳴指即
彈指也

口不

敢言駢倚用之如左右手公私大小之事皆決於用之

退賢進不肖淫刑濫賞駢之政事於是大壞矣用之知

上下怨憤恐有竊發請置巡察使駢即以用之領之募

險獠者百餘人縱橫閭巷間

獠古外翻謂之察子民間縱子容翻

呵妻詈子靡不知之用之欲奪人貨財掠人婦女輒誣

以叛逆榜掠取服

榜音彭掠音亮

殺其人而取之所破滅者數

百家道路以目將吏士民雖家居皆重足屏氣

重直龍翻屏必

翻用之又欲以兵威脅制諸將請選募諸軍驍勇之士

二萬人號左右莫邪都

邪讀曰耶

駢即以張守一及用之為

左右莫邪軍使署置將使如帥府

帥所類翻

器械精利衣裝

華潔每出入導從近千人

從才用翻近其靳翻

用之侍妾百餘人

自奉奢靡用度不足輒留三司綱輸其家

三司綱謂戶部度支鹽鐵

所發綱運輸朝廷者

用之猶慮人泄其奸謀乃言於駢曰神仙不

難致但恨學者不能絕俗累

累良瑞翻

故不肯降臨耳駢乃

悉去姬妾

去羌呂翻

謝絕人事賓客將吏皆不得見有不得

已見之者皆先令沐浴齋祓

祓敷勿翻又方廢翻祓除穢惡也

然後見

拜起纔畢已復引出由是用之得專行威福無所忌憚

境內不復知有駢矣

為黑師鐸討用之殺駢張本復扶又翻

王鐸將兩

川興元之軍屯靈感寺涇原屯京西易定河中屯渭北

邠寧鳳翔屯興平保定難屯渭橋

難乃旦翻

忠武屯武功

官軍四集黃巢勢已蹙號令所行不出同華

黃巢將朱溫時據同

州李詳據華州故號令之行止此二州華戶化翻

民避亂皆入深山築柵自保

農事俱廢長安城中斗米直三十緡賊賣人於官軍以
為糧官軍或執山寨之民鬻之人直數百緡以肥瘠論
價

資治通鑑卷二百五十四